

NGOLO YA NSOBOLO



[Mpangi Branham ke na kuniunguta *Kwikila Kaka*—Mu.]

² Ya ke vwanda mutindu mpasi samu na muntu nyonso na kutuba bawu mosi na—na ntangu mutindu yayi, na kutuba wapi mutindu mu ke sepela na bweso yayi ya kuvwanda awa na suka yayi, mpe—mpe na kati-kati ya beno, samu na kulonga Ndinga ya Nzambi, yina mu ke kwikila ti beno me zaba yawu mbote. Mpe—mpe mu zola kutonda Mpangi Leo mpe Mpangi Gene, mpe beno nionso bantu, samu na bweso yayi ya nene.

³ Mpe mutindu mu vwanda kuwa nkunga ya ntete, tii na nsuka, ya kele na kima mosi samu na bankunga yina, ya kele kusambila yina beno ke monaka diaka ve. Mpe ya ke vwandaka ntangu nionso bweso ya nene samu na munu ntangu mu ke kwisaka awa, pene ya mbala mosi na mvula mosi, to mbala zole, samu na kufulusa beno na bumbote ya bankunga yayi.

⁴ Mpe mu vwandaka banza na suka yayi, ntangu Mpangi Leo zabisaka nkunga ya *Bawu Katukaka Na Esete Mpe Wesete*, mpe samu na kento ya munu vwandaka yimba yawu ntangu mu kwendaka na . . . bikaka yandi mpe—mpe Billy mpe Rebecca, samu na kubanda reveil yayi ya nene, ya ngudi ya yawu, kasi, mutindu yawu panzanaka na bayinsi. Mpe na yina mu vwandaka banza, mutindu mu talaka nkonga yayi ya kitoko, ya bakento ya bunkete. Mu ke bambuka moyo na Meda vwandaka mosi ya bawu, yandi vwandaka mwana-kento mosi ya ntwenya ya bansuki ya ndombe. Mpe ntangu yayi yandi kele mutindu munu mosi, beto ke na kununa mpe na bansuki ya mpembe, mpe bantangu ya beto ke na kulutaka nswalu. Mpe dyaka na Kivuvu yayi ya nene, ti beto ke vukana dyaka kintwadi na Yandi, kisika ya ke vwanda dyaka ve na ntangu ya kulutila, kiboba, kima ve ke kanga beto nzila to ke kwamisa beto.

⁵ Mu ke kwikilaka ve ti mu zaba kisika mosi yina mu me monaka ntete ve na luzingu ya munu, mingi-mingi na bantu ya kulutila mingi yayi, kisika ya vwandaka na Baklisto mingi ya mbote na zola yayi. Beno bika yawu ve kufwa na kati-kati ya beno. Beno bambuka kaka moyo.

⁶ Mu vwandaka na mwa . . . kutuba na kati ya bantu. Nkumbu ya kento ya munu vwandaka Hope; kento ya munu ya ntete, mama ya Billy. Bawu vwandaka . . . Ya vwandaka na tatu ya beto kuna, yina vwandaka Hope, mpe munu mosi, mpe Billy. Ba vwanda bokilaka beto, “Hope, lukwikilu, mpe zola.” Mpe ya monanaka ti ya vwandaka na lukwikilu ya ngolo, mutindu, na bilumbu yina, samu na kukwikila ti Ndinga yayi vwandaka kieleka; mpe, yina Nzambi silaka, Yandi ke sala.

⁷ Mpe, kasi, beno me mona, “Ya kulutila nene na yayi kele zola, kele zola.” Mutindu Mpangi Leo me tuba na suka yayi. “Zola! Kisika ya kele na bandinga, ya ke suka. Kisika ya kele na baprosesi, ya ke kubwa. Kasi ntangu zola, yina kele zola, ya ke vwanda ntangu nyonso.” Beno me mona?

Mwana-dimeme ya luzolo yina kufwaka,
 Ndinga ya Nge ya ntalu
 Ke zimbisa ata fioti ve Ngolo ya Yandi,
 Tii kuna Dibuundu nyonso ya Nzambi yina
 kuzwaka mpulusu
 Beno kuzwa mpulusu samu na kusumuka
 dyaka ve.

Kubanda ntangu yina na lukwikilu mu
 monaka masa
 Ke basika na bamputa ya nge,
 Zola ya mpulusu vwandaka dilongi ya munu ya
 nene,
 Mpe ke vwanda tii mu ke kufwa.

⁸ Mu banza ti ya kele ve na kima ya kulutila nene na zola. Mpe zola, kana beto lenda ve kutuba yawu. . . Ntangu yayi, beto lenda tuba ti beto kele na zola, beto ke tuba kaka yawu. Kasi ntangu beto lenda kieleka kutuba yina beto me tuba ti beto kele na yawu, na yina beto ke lakisa yawu na kati ya beto mosi.

⁹ Ntangu yayi beto kele ve bantu ya kulunga. Beto ke salaka bifu ya beto. Beto ke salaka bima yina kele yimbi. Kasi, beno me mona, zola ke fuka yawu nyonso. Beto zola, ntangu beto ke mona bifu ya beto, kuvutuka mpe kulomba pardo samu na mosi na yankaka. Yinga, ya kele—ya kele binwani. Ya kele—ya kele kieleka babakala mpe bakento yina ya ngolo. Muntu nionso lenda kwenda na kilanga ya bitumba, yina ke na kikesa mingi samu na kutambula kuna; kasi ntangu ba ke nunga yandi, na manima ke telama mpe ke meka dyaka yawu, beno me mona. Ya vwandaka vwanda na nkunga yina ntwenya ya bakala mpe ntwenya ya kento vwandaka yimbaka na dibuundu, “Kana mu kubwa to kana mu kubwa,” beno me mona, “kana mu kubwa to kana mu. . .” Mu me zimbana mutindu ya ke kwendaka. “Bika mu telama mpe kumeka dyaka.”

Lemvokila munu, Mfumu, mpe meka munu
 mbala mosi dyaka, (Beno me mona? Beno me
 mona?)
 Kana mu kubwa to kana mu sumuka, bika mu
 telama mpe mu meka dyaka,
 Lemvokila munu, Mfumu, mpe meka munu
 mbala mosi dyaka.

¹⁰ Mpe na bantu nkama mosi na makumi zole awa kintwadi, beno me tumama na ngolo na—na kumona bima bantangu yankaka, mbeni ke kota na kinsweki na kati-kati ya beno, mpe

na nzila ya mabanza ya beno, mpe—mpe kubanda *yayi, yina*. Beno sukisa kaka ntangu yandi ke sala yawu. Beno banza na manima, beno banza na suka yayi, beno banza na bantangu yina beno kele ya kuvwanda kintwadi na bisika ya Mazulu na kati ya Klisto Yesu.

¹¹ Bayankaka na kati ya beno kele ba-plombier mpe bayankaka kele bisadi ya mabaya mpe bayankaka *yayi, yina*, mpe *yankaka*. Beno ke kutana na yinza konso kilumbu, ntangu beno kele kuna. Kasi ntangu beno ke mona bima yina, mpe bampukumunu ya nene ke basika, beno bambuka kaka moyo na mwa bisika yayi, ya santu kisika beno kele ya kuvwanda kintwadi, na kima kaka yina ya nsuka. Kialu ya nge ke kubwa, mosi ya bilumbu yayi. Mavimpi ya nge ke kubwa. Ata mpe luzingu ya nge, awa na zulu ya ntoto, ke kubwa. Kasi na yina Yawu ke kubwa ve. Mpe kana Yandi kele na kati-kati ya bima nionso, na yina beto bumba mabanza ya beto na zulu ya Dikunzi, yina me benda beto na yayi.

¹² Oh, nkonga ya bantu ya kitoko, ya bunkete na kutala! Mu zola kutuba mingi ve samu na bilele ya beno. Bilele ya beno kele ya bunkete, ya kieleka, mpe nyonso, bizizi ya beno. Mu banza ti mwa bamama yayi awa, ata ditona ve ya rouge à lèvres na zulu ya mosi ya bawu; bawu nyonso na nsuki ya yinda, ntwenya mpe kiboba, ya bamvula ya kati-kati mpe nyonso. Yinga. Beno me mona? Mbote, beno ke bakula kaka ve yina kele kimvwama yina kele na beno awa, beno me mona, na lukutakanu yayi ya fyoti ya chapelle.

¹³ Mu zola kuvutula matondo na Mpangi-bakala mpe Mpangi-kento Shantz, mpe, mpe samu na bweso yayi ya kuvwanda na yinzo ya bawu. Mpe yayi kele yinzo ya bawu ntangu yayi, yina ba me tekisa lupangu ya bawu, mu banza, na Canada, mpe ba me kwisa kuzinga ntangu fioti na beto. Beto kele dyaka ve na bimvwama ya ntoto. Beto ke na kusosa Mbanza yina ke na kwiza, Yina Kitungi mpe Kiyidiki kele Nzambi.

¹⁴ Mpe mu ke tonda Mpangi Leo mpe Gene, samu na kukwikama ya bawu, na vision yina ba pesaka bawu ntangu beto kutanaka ntete. Kukondwa ntembe ti yina yandi tubaka na beno bambala mingi. Ya kele ngitukulu, mu monaka yawu ve kaka mutindu yayi. Mu zabaka ti ya vwandaka na kima mosi na ntuala. Ntangu ntwenya ya bakala kwizaka na munu mutindu...na ndosi yina yandi kuzwaka na pyramide, ya kutelama na pyramide yayi. Mpe yandi mataka na kisika yina mu vwandaka, mpe mu vwandaka ya kutelama kuna na soucoupe, dilonga, to kima mosi mutindu nsemo.

Yandi tubaka, “Mpangi Branham, wapi mutindu nge ke mata kuna?”

¹⁵ Mpe mu tubaka, “Mpangi Leo, Nzambi fwana tula muntu na kati ya kisika yayi awa.” Mu tubaka, “Ntangu yayi yina nge me

mona, vutuka na bantu mpe tuba na bawu ti nge ke kwikila ti ya kele ya Nzambi.”

¹⁶ Mpe mu zabaka fyoti kuna, ti ntangu mu kuzwaka kisika mosi, Mu—mu zola bana-babakala, mpe mu zolaka ku—kutula bawu na kisika yina mu lendaka vwanda na bawu, mpe bawu bandaka na kusala ba-bande, kasi beno me mona, na yina me tala munu mosi, ba zolaka sala kaka ba-bande, landila mutindu mu zaba, kasi wapi kima ya kulutila nene Nzambi salaka samu na bawu, kulutila kusala ba-bande, beno me mona. Kaka muntu nionso lendaka sala bande, yina kele na mayele ya kupelisa magnetophone, to lendaka kuteka. Kasi ya ke lomba lutwadusu ya Mpeve-Santu samu na kutwadisa mwa kimvuka mosi kintwadi mutindu yayi, na suka yayi, mpe kubumba bawu kintwadi na ngwisani mpe kuvukana, mpe dyaka kukangama na Nsangu.

¹⁷ Nzambi, bika ti Nge—bika ti Nge pesa, na bantu yayi, luzingu ya yinda awa na zulu ya ntoto, nsayi mpe kiese, mpe na manima “kota na bakyese ya Mfumu” na nsuka ya nzila.

¹⁸ Beto me kubama ntangu yayi samu na bitumba, Mpungi ke bula. Bankunga me yimba, ntangu yayi me kwisa Ndinga. Mu banza, mutindu mu me telama awa, ti beno zaba. . . Yinga, mu banza ti beno ke sala yawu.

¹⁹ Kasi samu na kuwa milabu yayi ya basoda yayi ya bantwenia awa! Mpe munu mosi ke na kukumaka kiboba, mpe ke kuwa bisika nyonso, mpe lukwikilu ya beno mpe kivuvu, mpe yina beno me tula na kati ya kukwikila Nsangu yina—yina ba pesaka munu na Nzambi. Ntangu yayi, kana ya vwandaka ve samu na beno nyonso, Nsangu zolaka sala ata mbote ve. Beno me mona, ya fwana—ya fwana vwanda muntu yina ke kwikila Yawu. Mpe ntangu nyonso yina Yawu ke katuka na Nzambi, ya ke vwanda na muntu mosi ke kwikila Yawu, beno me mona. Nzambi me sala nzila. Yandi—Yandi me tula ekonomi ya Yandi ya nene mutindu yina, ti, ntangu Yandi ke fidisa Kima mosi, ya kele na kima mosi kuna samu na kukutana Kima yina. Mudindu ke bokilaka mudindu. Ya fwana—ya fwana vwanda mutindu yina.

²⁰ Mu ke zolaka mpova yina Mpangi Gene me sadila na kisambu na suka yayi, “Na lufundusu ya Yandi ya nene.” Mu ke kuwaka mutindu yina ntangu mu ke zabuka kyamvu yina kuna, samu na—na kukwisa kisika Nzambi ke kuzwa lukumu mpe luzitu. Mpe beno bumba yawu mutindu yina. Ata ntangu mbeni. . .

²¹ Ntangu yayi beno bambuka moyo, beno zimbana yayi ve; Mpangi Leo mpe Gene, mingi-mingi. Ntangu yayi, beno banza ti Satana ke bika yayi kulandila mutindu yayi, kukondwa kukanga nzila? Oh, ve. Kieleka yandi ke sala yawu ve. Yandi ke kota kuna, mosi ya bilumbu yayi, kaka mutindu kitembo ya ngolo. Kasi ntangu—ntangu mbeni ke kwiza mutindu kufuluka ya maza,

Mpeve ya Nzambi ke telemisa bendele samu na kutelemina yawu. Beno landila kaka na kuzanguka na zulu beno mosi na kati ya kisambu na ntwala ya Nzambi. Beno kangama na mosi na yankaka. Beno kangama na Nzambi. Samu ti, kana beno zolana mosi na yankaka, ya ke lakisa ti beno zola Nzambi. “Yayi bantu nionso ke zaba, ti beno keke bilandi ya Munu, ntangu beno ke zolana mosi na yankaka.”

²² Mpe mu banzaka, mwa ntangu fioti me luta, “Wapi mutindu ya kuyimba ya kitoko! Wapi bandinga ya kitoko! Wapi mutindu ya nkonga ya babakala mpe bakento ya mbote, babakala mpe bakento ya makwela; bantwenya, biboba, mpe bantu ya bamvula ya kati-kati, ya kuvwanda kintwadi awa.” Mu banzaka, “Mbote, ba zolaka vwanda na yawu kuna na Prescott, ba zolaka vwanda kuna mpe zolaka vwanda na mwa nsamununu na ladyo mutindu yina.” Ni kuna, beno me mona, ya ke vwanda kaka na nyonso ya kieleka ve yina Nzambi me bokila bantwenya yayi ya babakala na kusala. Beno me mona? Beno me mona? Ba ke bokila Kento ya makwela, beno me mona, yina ba ke bokilaka na kubasika, ntangu yayi kimalu ya munu keke awa, samu na kubokila. Mpe kuna bima mutindu yayi, mpe kisika wapi beno ke vukana beno mosi kintwadi, mpe kukangama beno mosi, kisika wapi beno zola kusansa bana ya nge, na kukebaka mosi na yankaka konso kilumbu, mutindu disu ya ngononi vwandaka tala bantwenya ya bawu, samu ti beno ve. . . Kana beno mona kima ya yimbi, na yina beno ke bokila muntu yina na lweka mpe beno sambila samu na yawu, mpe bima ya mutindu yina. Beno keba yawu ya kuvedila, santu, samu ti Mpeve-Santu kuzwa kisika kwisa kutala.

²³ Nzambi ke zolaka ba sambila yandi. Mpe ntangu beno ke sambila Yandi, ya keke kaka ve kieleka kuyimba nkunga mutindu beto ke salaka, kasi na kuyimbaka yawu na kati ya mpeve ya kusambila, beno me mona, kuna beno ke tala Mpeve-Santu kuvutula mvutu.

²⁴ Mpe mu ke mona bakala ya nene ya ntwenia awa, beno banza kaka na kilumbu yina nkonga ya bantwenia yina me vwanda kuna, bantwenya ya babakala mpe mwa bakento ya bawu ya kuvwanda awa, mpe bakala ya nene, ya ngolo ya kuvwanda kuna mpe vwandaka dila kaka mutindu mwa ba-bébé.

²⁵ Na yina, beno tala bubu yayi, bawu keke awa na bala-bala, ke zinga na kinsuza mpe mvindu ya yinza, mpe nyonso.

²⁶ Mpe kubanza ti beno lendaka kuvwanda na kingenga mpe kuvukana mutindu yayi, kisika Psalmiste tubaka, “Beno tala yinki mutindu ya keke lembami mpe kitoko samu na bampangi na kuzinga kintwadi na kati ya bumosi. Ya keke mutindu mafuta ya kupakulama yina vwandaka na zulu ya mandefu ya Aaron, yina vwandaka kulumuka tii na bansongi ya bilele ya yandi.” Na yina, mafuta yina ya kupakulama. . . Na yina, beno zaba

yina mafuta ya kupakulama salaka, ya vwandaka keba yandi na kukwenda na Mvwandulu ya Nzambi. Beno me mona, yandi zolaka vwanda ya kupakulama na mafuta yina ntete yandi kota na kati ya Mvwandulu ya Nzambi. Mpe ntangu bampangi lenda zinga kintwadi na kuvukana na bumosi, ya kele mutindu mafuta yina. Na yina beto ke kota na Mvwandulu ya Mfumu, na kupakulama yina ya bampangi kintwadi na bumosi. *Mafuta* ke monikisa “Mpeve-Santu.”

²⁷ Ntangu yayi beto lenda kuzwa kaka mpova ya kisambu ntete kukota na kulonguka Ndinga.

²⁸ Tata ya Mazulu, mutindu mpangi ya beto ya bakala me tuba na suka yayi, kukota na kivinga ya nene ya lufundusu ya Mfumu! Ntangu yayi, Tata, beto me bakula kimvuka yayi ya bantu awa, mpe ntangu yayi yina mu ke tuba, mu fwana pesa mvutu na Kilumbu ya Lufundusu. Mpe yayi kele bana ya Nge. Sakumuna bawu, Tata, ntangu nyonso. Sakumuna Mpangi Leo mpe Mpangi Gene. Bika ti bawu twadisama na Mpeve-Santu ya Nge, samu na kutwadisa bantu yayi, mutindu beto ke sala nzietolo yayi na kulala ya mwini. Mpe na yina, O Mpeve-Santu ya Nzambi, twadisama beto na Mwana. Pesa yawu, Mfumu.

²⁹ Buka Dimpa ya Luzingu samu na beto, na nzila ya Ndinga. Mpe beto kele. . . Ntangu yayi beto me bakula ti beto kele na bitumba ntangu yayi. Beto ke lwata bitini ya binwaninu ya kisengo, awa basoda yayi me lwata, yina bawu fwana kunwana na yawu, na kati ya bangunga yina me bikana na luzingu. Mpe mu ke sambila, Mfumu, ti Nge ke tula kaka konso kitini kisika yina ya kele, kisika ba lendaka telemina mbeni ntangu nyonso yandi ke telemina bawu. Pesa yawu, Mfumu. Beto ke sambila na Nkumbu ya Yesu Klisto. Amen.

³⁰ Ntangu yayi, mu ke vwandaka malembe na—na nzonzolo, samu ti mu kele—mu kele longi yina me longukaka ve. Mu zaba ti ya kele na bantu awa yina kele na mayela mingi, ya mayela, ya kulonguka, mpe me tula yawu na lweka, samu na kwiza ntangu yayi mpe samu na kukabuka bawu mosi, na kati ya kukikulumusa. Paul ya nene, ntumwa, mu ke banza na bandinga ya yandi ntangu yandi tubaka ti, “Mu me kwiza ve na beno na bandinga ya luvunu ya muntu, samu ti kuna beno ke tula lukwikilu ya beno na yawu, kasi mu me kwiza na beno na ngolo ya Mpeve.” Beno me mona, bima ya nene yina yandi zabaka ti yandi vwandaka na yawu, yandi tulaka yawu na lweka. Mpe mu ke tala na suka yayi, mutindu muntu awa, mutindu Mpangi Hughy mpe mpangi ya kento, mulongisi awa na bilanga ya kumwangisa nsangu, mpe mingi ya beno bantu yina kele kieleka na mayela mpe na mayela mingi; mpe mu—mu ke kukitala fioti mingi na kutelama awa mutindu mu me longukaka mingi ve, na ntwala ya beno. Kasi mu. . . Mpe kuna kumona ti beno bantu, mutindu yina, ke—ke kukikulumusa beno mosi na bima yina, tula yawu na lweka, mpe kuvwanda mpe kuwa muntu mosi

yina zaba na mpasi ABC ya bawu, yina ke sala ti bantu ya nene kubasika na beno. Ya kele ve yandi yina lenda zangula mapeka ya yandi, mpe kubasika mpe . . . Ya kele yandi yina lenda kukikulumusa yandi mosi.

³¹ Mu banza, kikalulu, ba ke tezaka yawu na nzila . . . muntu, ba ke talaka yandi ve na nzila ya misisa yina kele na zulu ya diboko ya yandi to na nzila ya bimpusu ya maboko ya yandi, kasi bimpusu na mabolongo ya pantalon ya yandi kisika yandi ke sambilaka. Mu banza ti yawu yina ke salaka muntu.

³² Ntangu yayi mu zola kutanga, na suka yayi, ndambu ya Biblia. Mpe mu zola Ndinga, beno ve? Ntangu yayi beto me sambila Mfumu, mpe beto ke landila na kusambila Yandi. Ntangu yayi beto sambila Yandi mutindu Mbele ya meno, mutindu Yawu ke tambula na kati ya beto, samu na kutala kisika beto kele ya kutelama.

³³ Mpe mu—mu ke bikana, samu ti yayi kele kisika mosi mu ke kuwa ti mu lendaka—lendaka longa bima yina mu zola kutuba na suka yayi. Mpe na yina, ya kieleka, Mpangi Leo mpe Gene, mpe bayankaka, ke—ke sala mambu na zulu ya bawu, mutindu ntangu beto ke kwenda, mpe ke basisa dibanza mutindu mu kuwaka yandi na mutindu ya mbote mingi na nsangu ya yandi na suka yayi. Ti, yandi ke simba yawu. Kasi beno lenda tuba yawu ve na estrade mutindu yayi to na ba-bande yayi, kasi, beno me mona, beno vwanda kaka mpe beno longuka yawu. Beno landila kaka na kutanga yawu, mbala mosi mpe mbala na bambala. Ya kele mpasi na kubakula. Bantu mingi ke bakulaka Yawu ve! Mpe beno zaba, mwa—mwa kimvuka ya fioti ya mameme, ya kele—ya kele mutindu yina na kati ya bantu nionso? Ya ke vwandaka ntangu nionso mutindu yina.

³⁴ Kana bawu lendaka ve kubakula Mfumu ya beto mpe Mvulusi ya beto, Yesu Klisto, (ata mpe bantumwa ya Yandi, beno me mona) na yina wapi mutindu beto lendaka bakula Yawu na kilumbu yayi, beno me mona. Yandi tubaka, Yandi ke tuba bima yina kele ya kusungama, beno zaba, mpe Yandi ke tendula yawu ve. Yandi ke tuba kaka yawu. Yandi tubaka, mutindu mumbandu, “Kana ti beno kudya nsuni ya Mwana ya muntu mpe kunwa Menga ya Yandi, beno kele ve na Luzingu na kati ya beno.”

³⁵ Ntangu yayi yinki, ntangu yayi yinki kana—yinki kana dokotolo vwandaka ya kutelama pene-pene, to infirmière to kima mosi, na kati ya dibuundu yina, kilumbu yina, Yandi vwandaka tuba? Mbote, bawu tubaka, “Bakala yayi kele yina ke kunwaka menga ya bantu, beno me mona, yandi zola kunwa Menga ya Yandi.” Beno me mona, Yandi tendulaka yawu ata fioti ve. Yandi tubaka yawu kaka. Kasi na ntuala, Paul kwizaka mpe tendulaka yawu, mutindu ya vwandaka baka kominyo, beno

zaba, “ke kudya Nzutu ya Yandi mpe ke kunwa Menga ya Yandi.” Mpe na yawu Yandi tubaka kaka bima yango.

³⁶ Mpe na nsuka, na nsuka, bantumwa kilumbu mosi, mpe na manima ya mvumbukulu, ya vwandaka na mosi yina vwandaka ya kutelama na zulu ya dipeka ya Yandi, Jean Yandi zolaka. Yandi vwandaka ntwenya ya bakala. Mpe Yandi tubaka, “Yinki ya kele samu na beno kana muntu yayi zinga tii mu ke kwiza?” Kuna basikaka makelele mosi na kati-kati ya bawu, ti Jean lendaka ve—lendaka ve kufwa tii Yesu ke vutuka. Yesu tubaka yawu ve, Yandi kaka, “Yinki . . .?” Yandi tubaka, “Yinki ya kele samu na beno kana yandi ke zinga tii kuna?” Mpe kuna, ya kieleka, beno ke tanga na kati ya—na kati ya Ndinga ya beto, mutindu ti—ti Nzambi kuna . . . Yina ba tubaka samu na lukanu mosi. Bima yayi nionso kele samu na lukanu mosi. Nzambi bakaka ntwenya yango Jean mpe zangulaka yandi na kati ya Kimpeve, mpe monaka Nkwizulu ya Yandi, tii na nsungi yina ke kwiza. Beno me mona, yandi tubaka, “Yinki ya kele samu na nge kana yandi zinga tii kuna?” Yandi zingaka ve tii kuna, na nzutu; kasi—kasi Ndinga yina Yandi zonzaka na nzila ya yandi, ya me nata beto na nsungi yayi kisika beto kele ntangu yayi, beno me mona. Na yawu, yawu nyonso ke salaka kintwadi samu na mambote.

³⁷ Na ba-Romain, kapu yina ya mumesanu, mu zola baka mwa banzila awa, mpe na kutala banzila zole to tatu, banzila zole, mu banza ti ya kele, mpe kutanga. Mpe, na yayi, beno meka na kubangula yawu mutindu ya mbote yina mu zaba, na nzila ya lusalusu ya Mpeve-Santu. Romains, kapu 12.

Mu ke bondila beno, bampangi, na nzila ya mawa ya Nzambi, ti beno ke lakisa banzutu ya beno munkayulu ya moyo, ya santu, yina me ndimama na Nzambi, yina kele kisalu ya beno ya kusungama.

³⁸ Mu banzaka ti ya vwandaka kitoko mingi samu na kimvuka yayi na suka yayi, yina beno salaka. Ntangu yayi, “Mpe,” mpe kele kivukisi, mutindu mu me bakula.

Mpe beno fwanana ve na yinza yayi : kasi beno kele ya kusoba na nzila ya mbutukulu ya malu-malu na mabanza ya beno, ti beno lenda lakisa yina kele mbote, luzolo ya Nzambi mpe ya kudedema, mpe ya kulunga.

³⁹ Ya kele yina beto nyonso zola kusala, ya kele, “Kuwanda ve ya kufwanana na yinza yayi, kasi vwananda ya kusoba na nzila ya mbutukulu ya malu-malu na mabanza ya beno ya malu-malu, samu na kusala luzolo ya Nzambi ya kulunga mpe ya kudedema.” Ntangu yayi ti beto me kuzwa mpulusu, mutindu beto kele; mpe ti beto kele ya kufulukuka na Mpeve-Santu, mutindu beto me kuzwa; ntangu yayi beto zola dibanza yina vwandaka na kati ya Klisto, kuvwanda na kati ya beto, ti beto lenda soba na bima ya yinza ya luzingu, mpe ba ke nata yawu na kusala luzolo ya

kulunga ya Nzambi, na nzila ya kusoba, ya Mpeve ya Nzambi, na nzila ya Ndinga ya Yandi.

Ntangu yayi dilongi ya munu kele: *Ngolo Ya Nsobolo*.

⁴⁰ Mu lenda bika Biblia ya munu *awa*. Ntangu yayi, ya vwanda sadilaka, bamvula me luta, ntangu mu vwandaka ntwenya ya bakala mutindu bakala yayi, Mu—mu zolaka ve kusonika Masonuku ya munu mpe—mpe bima ntangu mu vwandaka longuka. Kasi ntangu yayi kubanda mu ke kuma kiboba, na yina, mu ke na kunata mwa buku mosi. Mpe—mpe ntangu mu ke kuzwa kima mosi, na yina, mu ke sonika yawu, mu fwana tula yawu na Masonuku. Mpe na ntuala, mu vwandaka na ndandani yayi ya Masonuku na mabanza ya munu, mu me katuka na kukulumuka.

⁴¹ Kasi, bankundi ya luzolo, mu kele ve ntwenya mutindu beno nyonso, na suka yayi. Kasi mu me nuna, mpe mu me luta na bitumba mingi ya ngolo, beno me mona; mpe, na kulutaka na bitumba yina ya ngolo, ke nata beno kisika beno kele na suka yayi. Beno me mona? Na yina, mu ke kwikila ti beno me bakula yawu. Nzambi me tula munu na nzila ya yawu, ti luzingu ya munu lendaka zibuka mutindu mosi, samu na kutuba “*yayi* kele Yawu, beno me mona,” kuna beno nionso ke tambula na nzila yina. Kasi na ntuala ya munu, ya vwandaka na muntu mosi yina zibulaka nzila samu na munu na kukwenda. Beno me mona? Mpe beto zibula nzila, mosi samu na yankaka. Mpe mutindu beno ke mona, ntangu yankaka, veteran mosi ya ntama vwandaka kuma kiboba, mpe bidimbu ya yandi vwandaka na zulu ya yandi, mpe mutindu Paul tubaka kilumbu mosi, “Mu ke tula kidimbu na kati ya nzutu ya munu bidimbu ya Yesu Klisto.” Beno me mona? Mutindu Timothée talaka na zulu ya bidimbu yina, mu banza, na buzitu, mutindu yandi salaka na ntwenya Timothée.

⁴² Ntangu yayi, “kusoba.” Mu vwanda salaka samu na Kompani ya Kusalu ya Leta, kisika beto vwandaka sala bafermier, mpe samu na kusoba. Ntangu yayi mpova kele, mpova zola kutuba, na kati ya yawu mosi, kima mutindu. . . *Kusoba*, zola kutuba “kima yina ba me soba, kima yina me soba na kima mosi na yankaka.”

⁴³ Mpe mutindu mu zola kuzonza, samu na baminuti makumi yiya na tanu ke landa to ngunga mosi, samu—samu na kusoba, Mu ke zola ku—kusadila dilongi yayi. Mpe mu—mu lendaka tuba mwa bima, awa, yina ke monana kieleka ya ngitukulu. Mpe mutindu Mpangi Leo me tuba kaka, “Baka yawu mpe longuka yawu kaka, mwa ntangu fyoti.” Beno me mona, beno banza kaka na yawu mwa ntangu fyoti.

⁴⁴ Kuvwanda ya *kusoba* kele “kusoba mpe kusala kima ya luswaswanu.”

⁴⁵ Mutindu ditaka-taka, ya me soba na ditaka-taka na zundu. Beno me mona, na mbala mosi, yandi vwandaka talana mutindu

nyawu, yandi kufukamaka, yandi kele—yandi kele na yintu mpe mukila ya yandi, mpe bima nionso ke monana kaka mutindu mbisi-niawu. Na yina, na manima ya mwa ntangu fioti, yandi ke banda na kuzimbisa, yandi ke zimbisa mukila, mpe yandi ke—yandi ke soba mutindu mosi na yankaka.

⁴⁶ Mu banza ti ya kele yina Paul zolaka vwanda na dibanza, ntangu yandi tubaka, “Beno vwanda ya kusoba na—na manima ya mbutukulu ya malu-malu.” Beto tala, beno bika mu sungika yawu. “Mpe benoku fwanana ve,” beno zaba yina *kufwanana* kele.

*. . . beno vwanda ve ya kufwanana na yinza yayi: kasi
beno vwanda ya kusoba na kusoba mabanza ya beno, . . .*

⁴⁷ “Kusoba ya mabanza ya beno.” Bima yina beno vwandaka banza na yawu, kele ya ntalu, beno tula yawu na lweka mpe beno soba na kima yankaka; yina beno vwandaka kilumbu mosi, na yina beno kele ntangu yayi. Beno me mona?

*. . . na kusoba ya mabanza ya beno, ti beno fwana
talisa . . . luzolo yna ya mbote, mpe yina me ndimama,
mpe ya kulunga, ya Nzambi.*

⁴⁸ Oh, ya kele yina beto nyonso zola kuzaba, mutindu ya kusala yawu. Beno me mona? Beto kele awa, beto zola Yandi; Yandi yulusaka beto, ntangu yayi beto zola kuzaba yinki ya kusala. Mpe beto ke na kumekaka na kukwenda fioti na ntwala na suka yayi, samu na kumata fioti mingi na zulu. Bantangu yankaka beto fwana sala bima yina . . . Beno kangama kaka na mwa . . . tii beto ke mona yina ya ke salama.

⁴⁹ Ntangu yayi na Genèse, kapu ya lte, “Mpeve ya Nzambi vwandaka tambula na zulu ya kizizi ya bamaza.” Beto ke bakula ti maza . . . Mpe—mpe Biblia ke tuba, “Na mbandukulu na manima kuna,” ti, yayi, “yinza vwandaka kukondwa mutindu, mpe vwandaka ya mpamba.” Ya vwandaka na kima yankaka ve kasi kaka mpimpa ya kawo. Mpe—mpe wapi mutindu ya mpasi ya zolaka vwanda kuna. Kima yankaka ve kasi kuna na kati ya mpimpa, kukondwa nsemo to kima mosi, mpe bakuningana ya masa, mpe mbwetete yina ke yenga-yenga vwandaka baluka mpe baluka pene-pene ya mazulu kisika mosi kuna. Ya zolaka vwanda misa ya—ya—ya kima yina ba me zimbisa kuzimbana, mutindu ya vwandaka, lendaka ve kuzwa nzila ya yawu.

⁵⁰ Mpe ya kele yina beto ke kumaka ntangu beto ke kumaka bambwetete yina ke yenga-yenga, ntama na Nzambi, kukondwa kivuvu, kukondwa Nzambi; kukondwa, ke tambula kaka na ziunga, kuna na mpimpa, na kuzabaka ve ntangu beto . . . kisika beto ke kwenda.

⁵¹ Mpe Nzambi bakaka kawo yina ya nene ya mudidi, mpe sobaka yawu na disamba ya Eden, beno me mona, na nzila ya Ndinga ya Yandi. Ya kele mutindu beto ke sobaka, na nzila ya Ndinga ya Nzambi. Ntangu Nzambi tubaka, “Ti nsemo

kuvwanda,” mpe ti masse ya ngidikulu kuna me kwiza na ziunga ya mwini, mpe bandaka na kudasuka pene-pene ya mwini, mpe kumaka disamba ya Eden samu yawu tumamaka na Ndinga ya Nzambi. Ya salaka luzolo ya kulunga ya Nzambi, samu ti ya sobaka na kawo, na disamba ya Eden, na nzila ya Ndinga ya Nzambi.

⁵² Ntangu yayi ya kele samu na yina beto kele awa. Ya kele Nsangu ya munu, me vwanda ntangu nyonso, ya kele Ndinga ya Nzambi. Beto fwana kangama na Yawu ata yina bima yankaka ke salama. Beno vwanda ntangu nionso na Ndinga yina. Beno tala ntangu nyonso bamitifi mpe balukanu ya beno, kana ya kele landila Ndinga ya Nzambi. Kana ya kele ve mutindu yina, beno bika yawu swi. Beno me mona? Kasi kana ya kele na Ndinga ya Nzambi, mpe ya kukangama na Ndinga ya Nzambi, na yina, ti, beno kangama na yawu.

⁵³ Ntangu yayi, Nzambi bantangu yankaka, kaka mutindu mwa kimvuka ya beno awa na suka yayi, Yandi ke bika yawu kusalama kaka ve na konso kilumbu. Yandi ke bika, Nzambi. . . Beto kele yina ke kota na mbangu, ata mbala mosi ve ti Nzambi kele na kati ya mbangu, Yandi tubaka kaka yawu, mpe, ti ya ke vwanda, samu ti ntangu Yandi ke tuba kima mosi, ya fwana vwanda, ya ke vwanda kaka. Yandi—Yandi ke bika yawu kubaka ntangu ya yawu.

⁵⁴ Yandi bikaka bana ya ba-Hébreu, bikalulu ya bawu ya kuzabana ya Masonuku, yina vwandaka ya kutelama na Ndinga ya Nzambi samu na kuvwanda kieleka, bawu tubaka, “Nzambi ya beto kele na kiyeka ya kuvulusa beto na dibulu yayi ya tiya, kasi,” beno me mona, “beto ke fukimina ve kiteki, samu yawu ke telemina Ndinga,” beno me mona, “ata ti, kana Yandi kufwa beto, Yandi ke vumbula beto dyaka,” beno me mona, beno me mona, mpe bawu, Yandi bikaka bawu kutambula tii na ndilu ya dibulu yayi ya nene, mpe kukota na yawu, na ntwala ya monanaka ti Yandi vwandaka sala ata bukebi ve, mutindu ti Yandi vwandaka tala bawu ve; kasi Yandi ke talaka ntangu nionso, ata mutindu yina. Yandi ke talaka ntangu nionso samu na yayi.

⁵⁵ Ntangu yayi Nzambi tubaka, “Ti nsemo kuvwanda.” Mpe bamvula mafunda sambanu ya bakaka Eden yayi na kukota na luzingu, mpe ba me longa beto na kati ya Masonuku, “Samu ti kilumbu mosi na zulu ya ntoto kele. . . to—to—to kele mutindu bamvula funda, na Nzambi; bamvula funda mosi na zulu ya ntoto, kele kilumbu mosi na Nzambi.” Na yawu ya bakaka bamvula mafunda sambanu samu na kusala ntoto yayi, mpe samu na kunata yawu na Eden. Kasi, beno me mona, ya vwandaka Nzambi, Mulongisi ya nene ya mayele nyonso, mpe Yandi—Yandi vwandaka na dibanza ya Yandi yina Yandi zolaka sala.

⁵⁶ Kaka mutindu ntangu muntu yina tungaka remorque yayi, ntangu muntu yina . . . Ntangu beno bampangi awa yina salaka parc yayi, wapi mutindu beno ke sala yawu, ya vwandaka na mabanza ya beno, beno landilaka na kusala vision yina.

⁵⁷ Ya kele mutindu Nzambi salaka na yina me tala yinza. Yandi salaka; ya vwandaka na dibanza ya Yandi. Mpe, kana beno tala, ya me kuma mutindu nsobolo, mutindu Yandi vwandaka longuka mingi ntangu nionso, ke sala kima ya kulutila nene mpe ya kulutila nene. Kasi, beno me mona, Yandi vwandaka na zulu ya yawu nyonso, mpe beno bika kaka yawu kusoba na yawu, beno me mona. Nyonso yina Yandi bandaka na kunata na zulu ya ntoto, kubanda luzingu ya bayinti, mpe mbisi, mpe nyonso yina; ya me kwiza na bandeke, mpe bibulu; mpe kuna kima na kati ya kizizi ya Yandi Mosi, muntu; mpe telemaka kuna, beno me mona, samu ya vwandaka na kulunga ya Yandi, na yina Yandi zolaka.

⁵⁸ Ya kele mutindu beno ke banda, mutindu remorque yayi. Beno lenda tula lufulu, mpe beno ke tuba, “Yinki nge ke na kusalaka?” Mutindu beno, ntangu beno nyonso katulaka matadi ya ntete na nsongi yayi awa. “Yinki nge ke sala?” Beno me mona, ya monanaka ve mutindu ya ke vwanda ntangu yayi. Ya ke talana mutindu mwa Eden, samu ti ya vwandaka na dibanza ya beno yinki ya kusala, mpe beno landilaka kaka na kusala.

⁵⁹ Ntangu yayi beto zola kusoba, beto mosi, na nzila ya mbutukulu ya malu-malu ya mabanza ya beto. Beno me mona, ve yina beto kele na yawu na zulu ya ntoto yayi, yina beto ke tala na zulu ya ntoto yayi; kasi yina beto ke kwenda, na yinza yina ke kwisa. Ya kusoba na nzila ya kusoba ya mabanza ya beto!

⁶⁰ Ntangu yayi, bamvula mafunda sambanu, Nzambi kuzwaka samu na kusala yayi, mpe beto ke mona na Genèse 1. Kasi, ntangu yayi beto ke mona yawu, na yayi, Nzambi vwandaka—vwandaka na lukanu yina Yandi zolaka kulungisa.

⁶¹ Mpe bantu mingi, na kulongaka na zulu ya Genèse, na manima awa na kapu ya 1te mpe kapu 2, mpe kapu ya 3, mingi-mingi, “Ya ke talana mutindu ti Nzambi ke vutukilaka Yandi mosi. To Yandi tubaka, Yandi kwendaka na ntuala mpe tubaka bima nyonso yayi yina Yandi salaka. Oh, mutindu Yandi. . . ‘Ti nsemo kuvwanda, mpe ti ya vwanda na *yayi*, mpe ti ya kwiza,’ mpe ya vwandaka ntete ve na kima mosi.” Ya vwandaka kima ve. Ya vwandaka ve na nsemo. Yinza yina—yina ya ntama vwandaka tepa kaka kuna na kati ya mpimpa yina, ya kufuka na maza. Kasi, beno me mona, Yandi zonzaka Ndinga ya Yandi, mpe kuna ya kele ntangu Yandi vwandaka zonza.

⁶² Ntangu yayi beto ke tala awa na Genèse 1, Yandi tubaka, “Mpe Yandi salaka muntu na kifwani ya Yandi Mosi, na mutindu ya Yandi Mosi, na kifwani ya Nzambi salaka Yandi (Yandi salaka) yandi, bakala mpe kento.” Beno me mona, Yandi vwandaka sala muntu, Yandi zonzaka kaka Ndinga. Na yina

beto ke mona ti, na manima bilumbu ya Yandi mingi lutaka, ya lendaka vwanda bankama na bankama ya bamvula, ya vwandaka dyaka ve na muntu samu na kubundula ntoto. Muntu ve zolaka tii ntoto, na yawu kuna Nzambi salaka muntu na fundu-fundu ya ntoto. Beno me mona, Yandi zonzaka Ndinga, mpe kuna Ndinga zolaka salama.

⁶³ Ntangu yayi, ntangu Yandi tubaka, “Ti nsemo kuvwanda,” mu banza ti ya lendaka vwanda na bankama ya bamvula, ya lendaka vwanda na bankama nana ya bamvula, ntete nsemo kuvwanda, kasi ya salamaka samu ti Nzambi tubaka yawu.

⁶⁴ Mpe Nzambi ke vwanda na Dibuundu, mu ke kipe ve bansungi yikwa ya mudidi beto ke luta, mpe nionso yina. Yandi ke vwanda na Dibuundu ya kukondwa ditona to mifutu, kana beto kele kitini ya yawu to ve, samu ti Yandi tubaka yimeni ti ya zolaka salama. Ya ke vwanda kuna.

⁶⁵ Mpe—mpe Yandi tumaka, na—na kusoba yawu na luzingu ya yinti mpe konso luzingu yina Yandi basisaka. Yandi tubaka bampova yayi, mutindu, “Ti ya vwanda na yinti ya diba. Ti ya vwanda na yinti ya chène. bika ti sapin kuvwanda.”

⁶⁶ Beno tala kuna na ntoto ya kuyuma, kisika beto ke zingaka awa na Tucson. Kuna, ya kele na ba-cactus, ke dumuka na ba-cactus, ba-cactus ya mutindu na mutindu. Kaka minuti makumi tatu kuna, vwandaka, Sherman ya kunamika kuna na zulu ya mongo. Ntangu yayi, cactus yayi ke yela ve na zulu *kuna*, mpe pine Sherman ke yela ve na yisi *awa*. Ntangu yayi, wapi kisika vwandaka Mayele yina kunaka nkuna? Beno me mona, ba zolaka katuka kisika mosi kuna. Ya vwandaka Ndinga ya Nzambi, “Ti ya vwanda,” mpe ya vwandaka.

⁶⁷ Ntangu yayi, beto ke mona ti nyonso yayi (na manima Yandi salaka yawu, na kusobaka yawu na mutindu ya yawu mpe luzingu ya yawu, mpe—mpe ba tulaka yawu nionso kuna na nzila ya Ndinga ya Nzambi, Mvangi), yawu nionso, beto ke mona, ti yawu nionso kwendaka na kati ya quartier general, yina ba bokilaka disamba ya Eden; mpe Nzambi tulaka mwana ya Yandi, mpe kento ya makwela ya mwana ya Yandi ya bakala, na zulu ya yawu nyonso. Beno me mona? Kivangu yayi ya nene, beno me mona, Yandi vwandaka na kikuma samu na yawu. Yandi salaka nyonso kitoko mingi! Yandi salaka bafololo, mpe luzingu, mpe bandeke; mpe ya vwandaka ve na lufwa, ata disumu ve, ata mpasi ve, ata kimbevo ve. Mpe kuna nyonso yayi ya nene ya kumata na quartier général mosi ya nene, yina vwandaka disamba ya Eden.

⁶⁸ Mpe kuna Yandi tulaka mwana ya Yandi ya bakala, Adam, mpe kento ya makwela ya Adam, kento ya makwela. Ntangu yayi beno lenda tuba, “Ya vwandaka kento ya yandi.” Na kieleka ya vwandaka kento ya yandi, kasi yandi ata mbala mosi ve. . . ata mbala mosi ve ti yandi vwandaka ntete kento ya yandi.

⁶⁹ Mutindu na Masonuku, beto ke mona ti, kisika Yawu tubaka, “Joseph, nge mwana ya David, kuvwanda na boma ve na kubaka na nge Marie kento ya nge, samu ti kivumu yina kele na yandi kele ya Mpeve-Santu.” Beno me mona? Ntangu yayi ya vwandaka kento ya yandi ntangu yandi salaka nsilulu na kukwela yandi, to na kuzwa yandi; kasi ya vwandaka ntete ve kento ya yandi, samu ti yandi zabaka yandi ata mbala mosi ve mutindu kento.

⁷⁰ Na yawu ya kele mutindu ya vwandaka awa, ya kele samu na yina mu tubaka, “Mwana ya Nzambi mpe kento ya yandi ya makwela.” Adam zabaka ata fioti ve kento ya yandi mutindu kento, kasi yawu vwandaka kento ya yandi, na mutindu nionso. Kaka mutindu Dibuundu ntangu yayi, mpe Klisto.

⁷¹ Ntangu yayi, na yina, nyonso lendaka kupema, samu ti bankuna nyonso ya mbote ya Ndinga ya Nzambi, yina Yandi zonzaka, basisaka na mutindu ya yawu. Ntoto kwizaka, ya vwandaka na nsemo. Ya vwandaka na mwini ntangu Yandi bikaka mwini kulezima. Ntangu yayi samu na yinki Yandi salaka mwini kulezima? Yandi vwandaka na dibanza ya Yandi, beno me mona, ti, kana mwini ke sema ve, fololo ke kula ve, ti Yandi ke zonga na luzingu. Yandi ke salaka nyonso kukutana lukanu ya yawu, nyonso yina ya kele. Mutindu yinti, ya ke buta acide mosi, to ya ke buta pomme. Yandi ke sala mbuma ya disamba, mpe nyonso yina. Ya kele nyonso samu na lukanu ya Yandi. Mpe nyonso zolaka salama, mpe Yandi zonzaka yawu. Ntangu yayi kima kaka yina Yandi zolaka sala, na manima ya kuzonga yawu, Yandi . . . kuzonga yawu, mu zola tuba. Yandi zolaka kwenda na kupema, samu ti Yandi zonzaka yawu, mpe ya zolaka salama nyonso samu ti Yandi zonzaka yawu. Mu zaba ve wapi mutindu ya lombaka kuluta na ntwala yawu salama, bakumanga yikwa mpe nionso yankaka. Kasi ya zolaka salama, samu ti Yandi tubaka ti ya zolaka salama. Yandi zonzaka yawu.

⁷² Kima mutindu mosi ya kele na Dibuundu awa na bilumbu ya nsuka. Yandi ke kuzwa Kento ya makwela. “Yandi kele na lenda na matadi yayi kubasisa bana na Abraham.” Kana beto landa Yandi ve, Yandi ke kuzwa muntu yankaka yina ke landa Yandi. Beno me mona? Yandi ke kuzwa Yawu, samu ti Yandi zonzaka yawu yimeni. Nyonso yina Yandi ke tuba, ya fwana vwanda mutindu yina. Ya lenda soba ve. Ya fwana basika mutindu yina, samu ti Yandi tubaka ti ya ke vwanda.

⁷³ Mpe kima nyonso yayi ya nene yina Yandi zabaka zolaka kusalama, na manima Yandi—Yandi tubaka yawu, Yandi zolaka kuzwa kupema. Bima nionso na yisi ya lutwadusu! Nkuna ya Yandi vwandaka Ndinga ya Yandi, mpe Ndinga ya Yandi kele nkuna. Yesu tubaka ti yawu vwandaka mutindu yina. Mpe nyonso zolaka vwanda mbote, samu ti Yandi tubaka ti yawu kubasisa na mutindu ya yawu, kusoba kaka na mutindu ya yawu. Beno me mona, Ndinga ya Yandi zolaka vwanda mutindu ya Yawu. Kana Yandi tubaka “yinti ya diba”, Yandi zolaka ve

kutuba diba mpe chène ya kuvukana kintwadi. Yandi zolaka kutuba yinti ya diba *awa*, mpe yinti ya *chène* kuna, bima nionso ya kuvwanda mbote na kisika ya yawu.

⁷⁴ Oh, kana beto lendaka kaka kulunguka yawu, ti wapi kitini ya Ndinga beto kele, beto fwana baka kisika ya beto, ata yina ya kele.

⁷⁵ Mu banza na mpangi-kento mosi ya ntwenya awa na kiti ya bambevo, na ntangu yankaka, bisambu yikwa ya kukwikama me salama na zulu ya yawu. Na yina beto ke bakula ve, na yawu beto ke pesa kaka yawu na Nzambi. Mpe na . . . Yandi kele fololo awa na kati-kati ya beno, na kitoko ya yandi mpe nyonso. Beno me mona, ti beto lenda telama mpe kukwenda bisika nyonso, mutindu yandi ke zola kusala yawu, kasi dyaka yandi kele kitoko kaka mutindu yandi kele. Mu ke vwandaka ntangu nionso ya kutwadisama na kutala mama yayi ya ntwenya, beno me mona, samu yandi . . . Beto nionso ke kwikilaka na kubeluka ya nzutu. Beto me mona Nzambi ke sala bimangu ya kulutila nene na zulu ya yawu, beno me mona. Mpe yandi zaba yawu, mpe, beno me mona, kasi yandi zola baka kisika ya yandi.

⁷⁶ Beno me mona, nyonso yina ya kele, ya kele yina beto zola. Mpe mu ke kwikila ti ya vwandaka David, tubaka, “Mu ke zola kuvwanda payaso na yinzo ya Mfumu, kulutila kuzinga na batenta na bantu ya yimbi.” Beno me mona, ata yina ya kele, “baka kisika ya munu.”

⁷⁷ Bantangu yankaka beno fwana kukabuka na nyonso yina kele ya luzolo na zulu ya ntoto, samu na beno, samu na kubaka kisika ya beno yina Nzambi me bokila beno. Mu ke kwikila ti beno lenda tanga na kati-kati ya banzila, yina mu ke na kutuba. Beno me mona? Bantangu yankaka muntu ya beno ya zola mingi na zulu ya ntoto, beno fwana pesana maboko na bawu; mpe baka kisika ya nge na Klisto, kisika Nzambi me bokila nge. Beno me mona? Kasi yinki Nzambi ke na kusalaka? Kusoba beno na yina beno vwandaka, mu banza ti mwana ya kento to mwana ya bakala, to ya lenda vwanda nionso yina ya kele, na dibuta mosi ya zola mingi na bantangu yankaka, Yandi ke tula beno kisika yankaka. Samu ti, ya kele mutindu ya Yandi ya kusala yawu, beno me mona, na nzila ya kusoba mabanza ya beno ya malu-malu, na kutumama na Ndinga ya Nzambi, kukondwa kutala yina kele ntalu. Beno me mona? Bima yayi ke kwizaka ve . . . Ya bokilaka ve . . .

⁷⁸ Mpulusu ya beto vwandaka kima ya mfunu ve, ya vwandaka Mwana ya Nzambi zolaka kufwa samu na beto. Beno me mona? Ya kele ve . . . Bima ya luvalu kele na ntalu ya nene.

⁷⁹ Samu na kulonga Nsangu yayi, ya vwandaka pete-pete ve. Beno me mona? Ve, ya kele ve. Mu zolaka manga nyonso yina vwandaka ya luzolo samu na munu, mpe bantu ya munu mosi, muntu nyonso. Kasi beno me mona luvalu ya yawu kele, beno me

mona, ya kele kusala luzolo ya Nzambi. Mpe kusala yawu, yina na kuzabaka ti ya kele na kima mosi na kati ya munu, ntangu ba vwanda tubaka. . . Mbote, ba zolaka tula munu ntama; mu banzaka ti mu me zimbisa mabanza ya munu. “Na kubotikaka na Nkumbu ya Yesu Klisto, ya kuswaswana na dibuundu. Mpe bima nyonso yayi!” Bawu tubaka, “Yandi kele kilawu.” Kasi, beno me mona, ata yina bawu tubaka, ya kele na kima fwana salama. Mpe Nzambi ke bakaka kaka muntu mosi, ke kotisa yandi na diboko ya Yandi, mpe ke tuba, “Sala yayi,” mpe beno ke sala yawu.

⁸⁰ Wapi mutindu ntalu ya lendaka vwanda samu na Santu Paul; longaka na yisi ya Gamaliel, mulongisi ya kulutila nene ya kilumbu. Mpe ke kulumuka, mpe kima ya kieleka yina yandi bokilaka kinzambi-nzambi, bima yina yandi banzaka ti yina vwandaka bima ya yimbi mingi yina zolaka salama na dibuundu, yandi ke kwisa kaka pene-pene mpe ke kuma mambele ya Yawu. Kima ya ngitukulu! “Mpe mutindu Nzambi ke salaka na mitindu ya ngitukulu, na mutindu ya ngitukulu, ya ngitukulu, mambu ya Yandi ya ngitukulu samu na kusala.”

⁸¹ Ntangu Nzambi tubaka yawu, Yandi zabaka ti Ndinga ya Yandi vwandaka nkuna; mpe yawu lendaka, yawu ke buta landila mutindu ya yawu. Ntangu yayi, ba tumaka yawu na kubasisa yawu kaka na mutindu ya yawu, mpe ya ke sala yawu ntangu nyonso kana muntu lenda ve kusimba na yawu.

⁸² Mpe mutindu mosi Dibundu ya Nzambi mpe nyonso yankaka, ke buta landila mutindu ya vwandaka ntete, kana ba-théologien me sobaka ve Ndinga yina, ke meka na kutula Yawu kisika yankaka, to kima yankaka. Nzambi me tuba Yawu. Mpe ata mutindu bawu lenda, bawu ke meka na kubebisa Yawu mpe ke soba Yawu, mpe nyonso yina, Ya ke buta landila mutindu ya Yawu. Ya kele kaka na kima ve ya kukanga Yawu.

⁸³ Mu banza ti mu ke wakana ve mutindu mu ke zonzaka na beno nyonso. [Mpangi Branham me sungika microphone—Mu.] Ya kele ngolo mingi? [Dibuundu me tuba, “Ve.”]

⁸⁴ Mpe, beno me mona, ntangu yayi beto ke mona nyonso na ndonga. Nzambi zonzaka yawu, mpe Yandi tubaka, “Ti ya vwanda, ti ya vwanda. Mpe ti ya vwanda na Eden. Ti ya vwanda na bafololo ya kitoko. Ti ya vwanda na mwana ya Munu, na kizizi ya Munu Mosi, ya kutelama kuna na disamba ya Eden, mpe ti kento ya yandi ya makwela kutelama na lweka ya yandi.” Oh, wapi mutindu ya kele kitoko, yinki ya vwandaka. Mpe Tata, Yandi vwandaka Tata, beno me mona, na yina bana ya Yandi Mosi basikaka. Mpe Yandi salaka paladiso samu na bawu. Nzambi zola kusala bima samu na bana ya Yandi.

⁸⁵ Beno ke bambuka moyo ve wapi mutindu, beno bamama, mpe ya lenda vwanda wapi mutindu; kana beno zolaka kukubika mesa, kana Junior vwandaka na nsatu ya basapatu ya mbote yina yandi zolaka, beno—beno zolaka sala yawu, beno me mona.

Ya lendaka vwanda nionso yina ya vwandaka, samu na kusala kima mosi samu na bana ya beno! Papa, wapi mutindu nge ke sala mwa ngolo mingi, samu na kuzwa kima mosi samu na bana. Beno me mona?

⁸⁶ Mbote, yina ke lakisa kaka ti beto kele na yisi *awa*, kibuti. Yandi kele Kibuti ya nene, beno me mona, mpe wapi mutindu ya kulutila! Kuyituka ve ti ntumwa tubaka, “Disu me monaka ve, to dikutu me kuwaka ve, to yawu me kotaka ve na ntima ya muntu, yina Nzambi ke na yawu, na kibumbulu, yina ke zolaka Yandi.” Beto lenda kaka ve kubakula na kati ya mabanza ya beto, beto, mabanza ya beto kele ve ya kulunga samu na kubanza na nzila ya mbote—ya mbote yina Nzambi ke na yawu na kibumbulu, na kati ya beto yina ke zolaka Yandi. Beno me mona, beto, mu lenda banza yina ya ke vwanda, mu lenda banza yina ya ke vwanda, kasi mu—mu. . . mabanza ya munu kele ve—ve—ve na dibanza wapi mutindu nene ya kele. Ya kele ntama na yawu. Beno lenda banza yina Mazulu ke vwanda ntangu beto nyonso ke vwanda kuna, mpe ntwenya, mpe ata disumu ve? Mpe ve. . . Oh, wapi kisika ya kitoko! Kasi, beno me mona, ya kele ntama na yawu. Beno me mona, beto, “ya lenda kota ve na ntima ya muntu, yina Nzambi ke na yawu samu na bawu, na kibumbulu.” Yandi tubaka yawu, mpe ya ke vwanda mutindu yina.

⁸⁷ Ntangu yayi na manima ya ngidikilu nyonso yayi ya kitoko yina Yandi kuzwaka kuna, ya ya ya. . . Mu zola tuba yawu ve na mpova yayi, ngidikilu, kasi ya vwandaka mutindu. . . Mama ve, na ntwala ya mwana yina ke kwisa, ba ke bokila yawu ve na ntoto? Bawu ke kuzwaka. . . mwa basabatu mpe bima nionso ya kukubama, beno zaba, kaka samu na mwa kitini yayi ya zola yina Nzambi ke na kufidisaka, na kuzwa yawu.

⁸⁸ Ya kele yina Nzambi salaka samu na Adam mpe Eve. Yandi vangaka disamba yayi ya Eden. Yandi zonzaka yawu, ya vwandaka na dibanza ya Yandi; mpe ntangu Yandi tubaka yawu, na yina ya fwana kusalama.

⁸⁹ Beno bumba yawu na mabanza ntangu yayi. Yina Yandi tubaka, ya fwana salama! Beno me mona, mpe Yandi lenda ve. . . Kima mosi ve lenda—lenda kanga yawu nzila, kima mosi ve lenda kanga yawu na kusalama. Ya kele ve na kima yina lenda bumba yawu na kusalama. Nzambi tubaka yawu, yina ke sukisa dyambu! Nzambi tubaka yawu, ya ke salama.

⁹⁰ Ntangu yayi Yandi vwandaka na nyonso yayi na kati ya dibanza, mpe Yandi tubaka, “Ti ya vwanda.” Ntangu yayi, ya kele Genèse 1, beno me mona, “Ti ya vwanda na *yayi*. Ti ya vwanda *yina*. Ti ya vwanda.” Yandi vwandaka kuna nkuna. “Ti ya vwanda *awa*. Ti ya vwanda *awa*. Ti ya vwanda *awa*.” Mpe Yandi zabaka ti ya zolaka vwanda mutindu yina, samu ti ya lenda soba ve.

⁹¹ Ntangu yayi yina ke pesa beto lukwikilu, na yina. Mpe yina Yandi tubaka *Awa*, ya ke vwanda. Na yina beto bika ti Nkuna yina kubwa na kati ya bantima ya beto, ti beto lendaka vwanda na bisika ya Yawu, beno me mona, na kati ya bantima ya beto. Mpe beto sala kisika yayi yina Yandi tulaka beto, na bilumbu ya nsuka. Beno me mona, “Bika ti Nkuna kubwa na kati ya bantima ya beto, Mfumu. Bika ti Ndinga ya Nge kubwa na kati ya ntima ya munu.” Bika ti ya vwanda ve na kukondwa lukwikilu!

⁹² Mutindu Abraham, ntangu yandi vwandaka kiboba ya bakala, yina vwandaka talana mutindu yina lendaka salama ve. “Wapi mutindu bawu ke sala yawu? Wapi mutindu yandi ke vwanda mutindu yayi?” Ata mbala mosi ve ti yandi talaka yawu. Yandi kuzwaka kaka Ndinga ya Nzambi, mpe landilaka na kukwikila Yawu, mpe Nzambi nataka Yawu na kusalama. Ntangu yayi, Nzambi tubaka bima yayi nionso, na yina yandi zabaka ti ya ke vwanda. Mpe ya salaka yawu, Yandi butaka mutindu ya yawu.

⁹³ Ntangu yayi ti Yandi sobaka kuna, nkuna nyonso na kivangu ya moyo mpe luvangulu yina zolaka vwanda, yawu kwisaka kaka mutindu Yandi tubaka yawu. To, Yandi tubaka, “Bika yawu vwanda.” Ya lendaka vwanda bankama na bankama ya bamvula lutaka, kasi awa beto ke mona yawu Eden mosi ya kitoko, mpe bandeke ya nene ke pepa. Bandeke yina zolaka kufwa ve. Mpe yingo na mwana-dimeme vwandaka kudia kintwadi, mpe nkosi, yingo na ngombe. Mpe kuna ya vwandaka ve na kufwa, ata lufwa, ata mawa ve. Mpe ya vwandaka na Adam mpe Eve, yina vwandaka tambula na disamba ya Eden. Konso nkuna ke butaka, ya lendaka ata fioti ve kusala kima yankaka. Ata mbala mosi ve ti ya lendaka sala kima yankaka, samu ti Nzambi tubaka, “Ti ya vwanda mutindu yina.” Ya zolaka vwanda mutindu yina.

⁹⁴ Oh, wapi mutindu mu ke zola kutelama awa muniti mosi, samu na kutuba, beno me mona, ya kele kisika beto ke mona, dyaka, kulungisama ya Ndinga yina.

⁹⁵ Ntangu yayi Nzambi tubaka, “Bika ti ya vwanda.” Mpe awa yawu me kwiza, ntete, na mutindu ya kulunga, kaka na nyonso ya kieleka. Ntangu yayi, yinti *yayi* lenda basisa kaka yinti yina. Yinti *yayi* lenda basisa kaka yinti yayi. Mpe Adam, mwana ya Nzambi, lenda basisa kaka mwana ya Nzambi. Beno me mona, beno me bakula yina mu zola kutuba? Ya kele kima nyonso na manima ya mutindu ya yawu, mpe na yawu Nzambi lendaka tuba, “Mbote, mu ke pema kaka ntangu yayi.”

⁹⁶ Mpe beno me tala, ya vwandaka kaka mwa bampova yina Nzambi zonzaka, kieleka, kubanda ntangu yina? Yandi pesaka yawu, na manima ya kubwa, na baprofete ya Yandi, mpe bawu ke basisa Ndinga ntangu yayi, beno me mona. Nzambi pemaka, Yandi vwandaka diaka ve na kima ya kusala. Bawu ke kwenda kaka na quartier général ya Yandi mpe ke konkota na kielo,

mpe ke tuba, “Tata, yinki ya kele?” Mpe Yandi ke fidisa Ndinga na nzila ya bawu. Beno me mona, Yandi kele na sysiteme, mpe mutindu ya kusala bima yango.

⁹⁷ “Ti ya vwanda kaka . . .” Mpe ya kele mutindu ya vwandaka, nyonso, ya nkuna ya yawu ke buta landila mutindu ya yawu. Ntangu yayi ntangu bima nionso vwandaka talana kitoko mingi, mpe bima nionso vwandaka salama kaka na yina Nzambi tubaka, ntangu yayi awa me kwiza muntu ya luvunu yina ya mayele ya yimbi, ya mvindu.

⁹⁸ Ntangu yayi ya kele yina mu ke na kumeka na kukebisa beno nyonso awa. Ntangu beno ke mona Nkuna ya Nzambi me banda na kusimba, kukula, beno tala muntu yayi ke kwisa kuna na kati malembe mutindu yandi lenda, beno tanga kaka Masonuku kaka samu na yandi yina ke ndima yawu ve, beno me mona. Beno tala yandi mbote, samu ti yandi kele muntu ya luvunu.

⁹⁹ Mu ke bokila yawu, kisika ya kisungiki, yina kele ya kusungika, yandi kele mubebisi, na kubebisaka bima yina kele ya kusungika. Yandi kele mubebisi, mpe, yandi, mubebisi, to musobisi, to mubebisi ya Nkuna ya kisina mpe dinaka ya kisina.

¹⁰⁰ Ntangu yayi beno me mona awa, mutindu na kati ya kimvuka ya beno awa na suka yayi, beno kele na dinaka, beno kele na vision. Ntangu yayi beno tala mbote mutindu yina, oh, yandi ke vwanda na mayela hya yimbi mpe na mayela ya kulutila yimbi mutindu yandi lenda vwanda, beno me mona. Kasi beno keba vision ya yandi, mwana ya bakala. Beno me mona, beno kangama na yawu.

¹⁰¹ Ntangu yayi mpe beto ke mona ti, ntangu yandi kotaka, yandi bebisaka nkuna yina. Mpe yandi bebisaka nkuna yina na kukotaka na bisika ya kuyuma, yina vwandaka Eve, mpe kubebisa nkuna yina, na nkuna ya kubeba, ntete yawu kuma kuna, samu na kubebisa disamba yina ya kitoko ya Eden.

¹⁰² Kisika—kisika, Mazulu, kima kaka yina kele, kele kaka kuvutuka. Kisika beto kele ntangu yayi, beto kele na nzila ya beto na mbandukulu yango ya ntete ya ngidikulu ya Nzambi, vutuka dyaka na disamba ya Eden; bakala mpe kento, kukondwa—kukondwa disumu to kima mosi, samu na kuzinga ya Seko. Kasi ku- . . .

¹⁰³ Ntangu yayi, ntangu yayi Yandi zola ti beto kusoba mabanza ya beto, na manima ya kusoba; to kusoba, kusoba dyaka mabanza ya beto—ya beto.

¹⁰⁴ Ntangu yayi Satana ke kwiza mpe ke tula kutengama na Ndinga, ke sala ti Yawu kutuba kima yina Yawu kele ve. Ntangu yayi ya kele yina yandi salaka na mbandukulu. Mpe ntangu yayi beno tala, yayi ke wakana ya ngitukulu na suka yayi, na—na bantu, kana mu ke vingilaka ve mpe mu ke banza mingi awa na ntuala mu kuma na dibanza ya munu ya ntangu nyonso yina mu zolaka ku—kukuma na beno. Yayi, yina, mubebisi kotaka;

mpe mutindu Nzambi bakaka bamvula mafunda sambanu na Ndinga ya kisina, samu na kubasisa konso ndinga ya mutindu ya yawu, mpe nyonso yina Yandi salaka ke vwanda Ndinga ya Nzambi Mosi yina ke butaka landila mutindu ya yawu, ntangu yayi mubebisi me baka bamvula mafunda sambanu, mpe samu na kubebisa Ndinga yina ya Nzambi. Mpe yinki yandi salaka? Yandi me nata yandi mosi na kifwani ya malu-malu ya Eden, Eden ya Satana. Ya kele kisika beto ke na kuzinga bubu yayi.

¹⁰⁵ Wapi mutindu yandi salaka yawu? Wapi mutindu ya lendaka salama? Ntangu yayi kitini ya mfunu kele yinki mutindu yandi salaka yawu. Mpe ya kele kisika beto fwana, yina mu kele awa, samu na kutula yayi na ntwala ya beno, samu ti beno longuka yawu ntangu yayi, mpe na bampangi awa, mpe nionso yina, na basabala ke kwisa, ti beno lenda mona mutindu Satana salaka yayi. Mpe beno tala mbote mutindu yandi kele na mayela ya yimbi, mpe wapi mutindu yandi kele mayele ya kulutila yimbi.

¹⁰⁶ Ntangu yayi, yandi bebisaka bankuna yayi. Ntangu yayi, yandi lendaka ve kubebisa yawu, yandi bebisaka kaka yawu. Ntangu yayi beto me bakula ti disumu kele ludedomo yina ba me bebisa. Ya kele kaka ti luvunu kele kieleka yina ba me talisaka na mutindu ya yimbi. Beno me mona, nyonso. Kinsuza kele kisalu ya kulunga, yina Nzambi tumaka, bakaka kaka nzila ya yimbi. Beno me mona, nyonso. Mpe lufwa kele kubeba ya luzingu. Lufwa ke bakaka kaka, beno me mona, kubebisa luzingu.

¹⁰⁷ Ntangu yayi yandi wandaka na bamvula mafunda sambanu ya kusala yawu na mwangisilu ya ndikila ya yandi. Mpe wapi mutindu yandi salaka yawu? Ntangu yayi yayi kele kitini ya ngudi. Mpe beno kuwa mbote ntangu yayi. Yandi salaka yawu na civilisation. Ntangu yayi ya ke wakana mutindu yankaka, kasi ya kele yina. Mu ke sala nsamunu mosi awa yina ke sala ti beno landila na kubanza, mu banza, baminuti fyoti; mu banza ve. Kasi beno me bakula yayi? Ntangu yayi mu ke na kumeka ve na kusadisa kukondwa kuzaba. Kasi beno zaba civilisation yina, science, ndongosolo, mpe bima yina beto ke zolaka mingi bubu yayi, kele kisadilu ya kieleka ya Satana, mpe civilisation? Civilisation kwisaka ata fioti ve na nzila ya Nzambi. Civilisation kwisaka na nzila ya Satana. Ntangu yayi mu ke siamisa yawu na beno na nzila ya Ndinga, kaka na baminuti fyoti.

¹⁰⁸ Civilisation kele ve ya Nzambi. Na yina, bika mu talisa beno; na kati ya civilisation yayi, kulutila beto ke kuma ya kutemuka na yina beto ke na kusalaka na nzila ya science, beto ke na kukifwa beto mosi. Beno me mona? Mpe civilisation yayi me tungama ntangu yayi, mpe beto me kuzwa lufwa na kati ya civilisation yayi. Beto kele na disumu na kati ya civilisation yayi. Beto me kuzwa kimbevo na kati ya civilisation yayi. Yina lenda vwanda ve ya Nzambi.

¹⁰⁹ Na yawu, Nzambi, na Nkonga ya . . . Kimfumu ya Yandi ya

nene, ya Nene yina ke kwisa, beto ke kuzwa civilisation, kasi ya ke vwanda ve kima mutindu yayi. Ya ke vwanda ve na nzila ya science. Ya ke vwanda civilisation ya lukwikilu, na nzila ya Ndinga. Beno me mona?

¹¹⁰ Civilisation yayi ya science kele na beto, kele na nyonso ya kieleka mutambu ya Satana, mpe ya kele yina yandi me kufwa bantu na yawu. Ya kele yina yandi ke na kufwa beto, konso kilumbu, na yawu. Ya kele mutindu, mutindu beto ke kudya, konso kilumbu; na kisika ya kuzinga, beto ke kufwa. Ba me bebisa bima nionso, samu na kubaka kaka yayi mpe kuvukisa *yayi* na *yayi*, mpe kuvukisa *yayi* mpe *yina*, *yina*, tii ya ke kufwa. Ya kele dikanda ke kufwa. Mpe ata yina beno ke meka na kusala, beno ke kufwa.

¹¹¹ Beno monaka foto yina mazono na nkokila, ya ba-Afrika yayi. Beno zaba samu na yinki? Ata mbala mosi ve ti bawu kuzwaka penicilline. Bantu yayi ke zingaka mingi kulutila beto. Bawu zaba kwandi ve bawu. . . Ba-germe ke kwamisa bawu ve. Beno me mona, samu na yinki, germe ke nanguna diboko ya yandi mpe ke bika bawu. Beno me mona? Samu ti yandi, beno me mona, yandi ve, yandi. . . Bawu ve. Samu na yinki? Bawu nyonso vwandaka ve. . . Beno me mona, beto ke baka, science samu na kubakula, mutindu penicilline to kima mosi ba ke tula na kati ya beto, samu—samu na kubasisa kimbevo yayi, mpe yawu ke mwangisa kima yankaka, mpe ke yidika ntoto ya lubutu samu samu na kima yankaka. Beno me mona? Ntangu yayi, yandi ke sala yawu ve. Beno me mona?

¹¹² Ntangu yayi mingi kati ya beno me katuka na ba bilanga. Muntu nionso me zaba ti yinti ya mbote ya mavimpi ya mbote kele ve na nsatu ya kumwangila maza. Ya kele—ya kele na kumanga mosi na zulu ya yawu, ya luzingu, ti germe mosi ve ke kwisa na zulu ya yawu, na zulu—na zulu ya yintu ya kieleka ya mavimpi ya mbote. Ya kele yinti yayi ya yinzo, ya kele yinti yayi ya kuvukisa yina beno fwana bondila!

¹¹³ Mumbandu, bayankaka na kati ya beno bampangi yina kele awa kele bantu ya Wesete awa. Beno tala kuna na ntangu ya ngombe ya kento ya ntama ya Longhorn. Bubu yayi beno ke tuba ti beno kele na ngombe ya kento ya kulutila mbote na ya beno—na Hereford ya beno. Beno ve? Beno kele na yawu ve. Ngombe yayi ya ntama ya Longhorn, yina vwandaka baka ve kisika ya mwana-kento yina ya ntama, kasi yandi lendaka, yandi ke lutisa hiver awa mutindu mvudi. Oh, yandi vwandaka ya kukonda mpe nyonso, kasi yandi vwandaka mbala zole ya kulutila. . .

¹¹⁴ Hereford yayi, beno ke katula nyanga na yisi ya yandi, ntangu beno ke baka foto ya yandi, na kivumu ya yandi, na kutala, samu na kulakisa ti yandi kele nyosi tii na lupangu. Mpe yinki ya kele? Beno ke bika yandi kuna, yandi ke kufwa. Yandi lendaka ve kulutisa yawu na hiver kana yandi zolaka.

Beno fwana kudisa yandi, mpe nionso yankaka, samu na kukeba yandi, kubondila yandi. Yandi kele kivukisi. Beno me mona? Kasi Longhorn ya ntama ya kieleka, ya kisina, beno bika yawu kaka.

¹¹⁵ Ya kele mutindu bubu yayi na Baklisto ya beto. Beto me kuzwa mingi yina beto fwana lengila, kubondila bawu, kutula bawu, kusala bawu diakre na kati ya dibuundu, kusimba yandi na zulu ya dipeka, mpe kupesa bawu kisika ya nene na kati ya dibuundu. To, kana ve, na yina, yandi, yandi ke—yandi ke kwiza ve, kana beno bika ve *yayi* kusala yayi, mpe *yayi* kusala *yina*. Ya kele bumwana.

¹¹⁶ Beno lenda banza ti Baklisto ya kieleka vwandaka mutindu yina? Ba vwandaka na mambu ya ngolo. Ba vwandaka na mpasi. Beno lenda banza ti Santu Paul vwandaka mutindu yina ya Muklisto, beno lenda banza na Santu Pierre, “Na kuvwandaka ntangu yayi—ntangu yayi, kana beno sala munu surveillant général ve, mbote, mu zaba ve, mu lendaka kwenda kota na *Yayi-mpe-yayi*”? Bawu vwandaka bantu ya ngolo. Bawu vwandaka bantu ya lukwikilu. Bawu zingaka na Nzambi. Bawu tambulaka na Nzambi. Bawu vwandaka bantu ya mwa bampova fioti. Bawu sadilaka Nzambi, kilumbu mpe mpimpa, ntangu nyonso. Beno zolaka ve kufula bawu mupepe mpe kudikisa bawu, mpe pesa bawu munkayulu *yayi*, *yina*, to *yankaka*. Ba vwandaka bantu, ya ngolo! Ba vwandaka bankuna ya kieleka, yina ba me vukisa ve na ba-denomination.

¹¹⁷ “Kana beno, ba-Méthodiste ke sala munu mbote ve, mu ke kwenda na ba-Baptiste. Ba-Baptiste ke salaka munu mbote ve, mu ke kwenda na ba-Pentecotiste. Kana bawu sala munu mbote ve, mu ke vutuka na bantu ya Katolika, to nyonso yankaka.” Beno me mona, bawu, ya kele yina ba me vukisa, ba fwana kulundila na kufula mupepe bawu mupepe, “Yinga, Docteur Révérend Mpangi *Kingandi*.” Ya kele Buklisto ve.

¹¹⁸ Buklisto ke yufula—ke yufula ata bisalu ve, ya ke lomba ata lusakumunu. Ya zaba kaka Nzambi. Ya kele nkuna ya kisina. Ya ke zolaka Nzambi, mpe ke zolaka mosi na yankaka. Kufula mupepe kele ve na zulu ya yawu, mpe kubondila bawu, mpe kusimba bawu, mpe kutuba, “Yinga, mbote, mpangi ya kento *yayi*, mbote, mu ke kwikila ti ya kele nyonso ya kulunga samu na yandi na kuvwanda na nsuki ya nkufi, mpe *yayi* ve.” Mpe—mpe ya kele ve na kima mutindu yina, mpe ti bawu kwenda na *yayi*. Ya kele—ya kele ngolo, ya kele Nsangu ya mbote! Beno tula yawu kuna, ti ya kubwa kisika ya ke vwanda. Baklisto zola yawu.

Ba fwana nata munu na Yinzo ya Mazulu,
Na zulu ya mbeto ya bafololo ya kukondwa
mpasi,
Na yina bayankaka nwanaka samu na
kununga ntalu

Mpe zyetaka na kuluta na kati ya banzadi ya menga?

119 Mu fwana vwanda ba lutisaka na zulu ya mukongo, mpe mutindu *yayi*, *yina* mpe *yankaka*, mpe kudikisa beto? Mu ke vingila kisika ya munu kuna na bantu ya kikesa. Mu ke vingila ve kukwisa kuna kukondwa bamputa ya lunungu.

Mu fwana nwana, kana mu zola kuyala,
Matisa kikesa ya munu, Mfumu!

120 Beno me mona, bika mu telama mutindu Muklisto. Ve samu na kuvwanda nkuna ya kuvukisa. Ba fwana bondila beno mpe kubondila, mpe kukotisa beno na kima mosi. Ba me kotisa beno ve na mutindu nionso, Buklisto, beno me butuka na kati ya yawu. Beno me kuma kivangu ya malu-malu, beno kele nkuna ya Nzambi, yina ke kota na ntoto.

121 Ntangu yayi, ntangu yayi beto ke mona ti yandi mwangisaka ndikila yayi, mpe mwangisilu yayi vwandaka mwangisilu ya lubakusu ya bilumbu yayi, ndongosolo, science, mpe civilisation, bima ya kieleka yina beto ke zolaka mingi. Beno me telemaka ntete na kubanza ti mbeni ya beto ya nene, na luzingu ya kimuntu bubu yayi na kati ya bayinsi, kele communisme? Yinki kele nzambi ya communisme? Civilisation, mpe malongi, science. Ya kieleka, mutindu yina ve? Yawu yina bawu ke zingilaka mpe ke tomaka, ya kele science, mambu ya science, ba-sciences, nzambi ya science. Ntangu yayi kana beno lendaka kaka . . . mpe na mwangisilu ya ndikila ya civilisation ya bilumbu yayi, ya science mpe ya ndongosolo.

122 Ntangu yayi beno bika mu siamisa na beno malongi yina mpe civilisation me katuka na dyabulu. Ntangu yayi beto vutuka awa mpe beto mona, kana beno zola, na Genèse, kapu 4. Mbote mingi, ntangu yayi beto banda na nzila ya 16 ya Genèse 4. Kumi na yiya awa to . . . Genèse 4, beno lemvo kila munu. Ntangu yayi beno tala, Satana . . .

123 Beno bantu, beno landa ba-bande yayi, na mpangi ya beto—ya beto ya bakala awa, ntangu yayi, beno me kuwaka munu kulonga na zulu ya *Nkuna ya Nyoka*, mpe yina ba lenda manga ve. Yina zibukaka na kati ya mosi ya Bidimbu Sambwadi yina. Yawu vwandaka ya kubumbama.

124 Ntangu yayi kana bana bana me kwisa na nzila yina, beno me mona, na nsi ya malongi ya mutindu yina, yawu yina bibuti ya bawu vwandaka, bawu kele na nkadulu ya bibuti ya bawu, ba-denomination ya bawu, mpe nyonso yina, bawu fwana kwikila yawu. Beno me mona, bawu ke kwikilaka yawu samu bawu me butuka na yisi ya bibuti yina. Kasi bubu yayi beto me butuka ve na yisi ya bibuti yina; Bibuti ya beto kele Ndinga. Mpe Ndinga . . . “Mbote,” beno tuba, “Mu butukaka na yisi ya Nzambi, mpe.” Samu na nsungi yina. Kasi yayi kele nsungi ya nsongi, yayi kele nsungi na zulu ya ba-denomination yina.

¹²⁵ Ya zolaka kwiza, ya fwana basika; Nzambi tumaka yawu mutindu yina, ti Bidimbu Sambwadi yayi fwana zibuka. Ya zolaka salama na nsungi yayi ya Laodicée. Mpe mu banza, kukondwa ntembe. . . Ve mutindu beto ke kukizangula; beto ke na luzangulu mosi ve, kaka na zulu ya Yesu Klisto; ata mosi ve ya beto. Beto ke kukizangula kaka na Yesu Klisto. Kasi beto ke vutula matondo na . . . samu na bweso ya kuzaba na nzila ya ata. . . kukondwa ntembe, Nzambi me soolaka beto na bilumbu yayi ya nsuka, mpe me siamisa yawu na nzila ya bidimbu na Mazulu mpe na ntoto; mpe mosi na mosi ya bawu ke vutuka mbala mosi na Ndinga, samu na kusiamisa ti ya kele mutindu yina, nsungi yayi yina beto ke na kuzinga, Nsangu mpe mutindu Yawu kele. Beto kele ve nsambulu. Beto kele ve nkonga ya bafanatiki. Beto kele bisadi ya Nzambi, yina ba me bokila na nzila ya Mpeve-Santu. Ba ke namika beno bankumbu ya mutindu na mutindu, kasi ya zola kutuba ve ti ya kele mutindu yina.

¹²⁶ Ntangu yayi beno bambuka moyo, mwana ya Satana vwandaka Cain. Ntangu yayi mu banza ti beno nionso me lutaka na ba-bande, na yina, mu ke mona ba yinzo ya babuku ya beno awa, ya yawu. Ntangu yayi beno bambuka moyo ti Eve kumaka na kivumu na Satana, mpe na kilumbu mosi. . . Beto kele na dyambu ya yawu na Tucson ntangu yayi, ti kento, kana yandi kuma. . . yandi ke zinga na babakala zole, yandi lenda kuzwa mitundu zole ya bana. Beto zaba yawu. Mu zabaka yawu na kati ya kuvukisa ya bayimbwa mpe nionso, mpe nionso yina, kana ya kele kaka na ntangu yayi.

¹²⁷ Na yawu Satana, na suka yina mu banza, kutanaka na muntu ya yimbi yayi, yina vwandaka nyoka; ve na kati ya bibulu yina ke tambulaka na kivumu, kasi kibulu; ya kulutila luvunu, na mayele ya yimbi, ya kulutila mayele, na kati ya baniama nionso, kaka na yisi ya muntu. Mpe muntu kele kibulu, yandi mosi, mpe beto kele—beto kele ba-mammifère, kibulu ya menga ya tiya.

¹²⁸ Mpe—mpe Satana vwandaka muniololo yina vwandaka landa awa, nyoka yayi, vwandaka kima yina vwandaka na manima ya muntu, kubanda na kimpenzi, kutelama na kati-kati ya bakala mpe—mpe kimpenzi. Ntangu yayi science ke na kutosaka muniololo yina ke kondwaka. Mpe ya me bumbama mingi na kukulumusaka yandi na yisi, mpe ata mukwa ve na kati ya yandi ke talana mutindu muntu, beno me mona, na kusalaka yandi kibulu yina ke tambulaka na kivumu ya yandi.

¹²⁹ Ntangu yayi, beto ke mona ntangu yayi, ti muntu yayi monaka Eve na disamba ya Eden, ntwenya ya kento yayi yina zabaka ata disumu ve, zabaka ve yinki vwandaka kinkonga ya yandi. Mpe yandi zabaka. Yandi vwandaka na mayela mingi, na mayela ya yimbi, na ndwenga. Mpe yandi tubaka na yandi, “Nkuna, mbuma vwandaka kitoko mpe yawu vwandaka mbote,” mpe. . . ntangu yandi zingaka na yandi na suka yina.

130 Mpe kuna, beno me mona, kuna, na manima ya midi, yandi ndimisaka Adam na kusala kima mutindu mosi, na kutubaka na yandi yina ya vwandaka.

131 Mpe kuna Adam na luzolo nyonso, na kuzabaka ti yandi zolaka sala yawu ve, yandi kwendaka na kento ya yandi mpe salaka kisalu yayi. Na yina, na nsuka yandi zolaka kwiza na yawu na mutindu nyonso. Kasi, beno me mona, ya zolaka vwanda mutindu yina, ndwenga ya Nzambi, samu yayi na yina, yina, ke talisa kinama ya Yandi kele Mvulusi, Tata, Munganga. Beno me kuwaka munu kulonga na zulu ya yawu, beno me mona. Ntangu yayi kana ba salaka yawu ve. . .

132 Yandi bikaka kaka bawu kuna na kimpwanza ya kusoola, samu na kubika bawu kusala. Yandi lendaka ve kusala bawu kusala yawu, mpe na manima kuvwanda kaka ya kudedema. Kasi Yandi zolaka tula bawu mutindu mosi na Yandi, mpe kimpwanza ya kusoola, mpe na manima kubika bawu kusala yawu bawu mosi. Mpe Yandi zabaka ti bawu ke sala yawu.

133 Mpe na yina, beno me mona, na yina ntangu Adam zingaka, yandi butaka mapasa. Mpe mosi ya bawu vwandaka ya Satana; mpe mosi ya bawu vwandaka ya Adam, yina vwandaka ya Nzambi. Caïn mpe Abel.

134 Mpe yina ke salama. Beto kele na dyambu kuna na Tucson ntangu yayi. Kento ya mundeke zingaka na bakala ya yandi na suka mosi, mpe na manima ya midi yina yandi zingaka na Muntu ya ndombe. Mpe mosi ya bana-babakala. . . Ya vwandaka na bana-babakala zole yina butukaka. Mosi na kati ya bawu vwandaka mwa Muntu ya ndombe na dibandi, mpe yina yankaka vwandaka ya mwana ya bansuki ya blondi, ya kitoko mingi. Mpe—mpe, beno banza ntangu yayi, yandi ke na kumeka na kundimisa pere blanc kukipé bana zole. Mpe yandi tubaka, “Mu ke kipe yina ya munu, kasi ya kele ve ya yandi. Ti Muntu ya ndombe kukeba mwana ya yandi mosi.” Na yawu, beno me mona, ya kele kieleka.

135 Ya kele ntangu nyonso mapasa. Mpe ya kele samu na yina. . . Beno zimbana yayi ve, mwa nkonga ya mameme. Dibuundu na bilumbu ya nsuka ke vwanda mapasa, “na yina pene-pene ti ya ke vuna bantu ya Kusolama. . .” Matthieu 24:24, beno me mona. Dibuundu ke. . . Ya kele mouvement ya ba-Pentecotiste. Ya kele mingi mutindu kima ya kieleka, tii ya ke “vuna bantu ya kieleka ya Kusolama kana ya lendaka salama.” Mpe mwa ntangu fioti na manima, kana mu kuzwa siansi, mu zola kutendula yina, wapi mutindu nsodolo yina ke kwisa. Beno me mona, ya ke vuna bawu samu ti ya kele kaka mutindu kima mosi. Beno me mona, kaka batata zole, kaka yina; mama mosi, dibuundu mosi, muvuma mosi, kima mosi. Ntoto kele mutindu mosi, kisika Ndinga ke kubwaka; kasi mosi ya bawu, mutindu awa, me beba. Beno me bakula? Beno tuba, “Amen,” kana beno me bakula. [Dibuundu

me tuba, “Amen.”—Mu.] Beno me mona, mosi ya bawu kele kubeba, samu ti ya kele tata ya yimbi. Na yina, mu ke talisa kilumbu mosi, kana Nzambi ke bika munu, ti denomination kele kidimbu ya kibulu. Beno me mona, ya kele tata ya yimbi, yandi ke ningisaka bantu na organisation na kisika ya Ndinga. Beno me mona, ya kele tata ya yimbi. Ya kele mouvement ya Cain.

¹³⁶ Ntangu mu ke vutuka na yinzo ntangu yayi, mu ke longa na zulu ya dilongi, *Nzila Ya Nyoka*; kibulu na mbandukulu, mpe kibulu na nsuka; mpe ke landa yandi kaka na nzila ya Biblia, mpe ke lakisa mutindu yandi ke mata. Beno me mona? Mpe beno nyonso ke kuzwa yawu na alo-alo, beno me mona, kana Mfumu pesa beto muswa ya kusala yawu. Mpe ntangu yayi beno tala kaka mbote mutindu mayela ya muntu yina kele, mutindu yandi kele kaka kieleka. . . Mbote, bawu kele kaka mutindu Judas mpe Yesu kuna, bampangi zole ya babakala na dikanda ya bawu, kaka mutindu Ésaü mpe Jacob. Mpe—mpe mutindu ngoyi-ngoyi mpe yembe, kele ya kuvwanda na zulu ya yinti mosi. Mpe nyonso kele mapasa, na—na mvita yayi ya nene yina beto kele.

¹³⁷ Mbeni ke sadilaka luvunu, mutindu yandi salaka na Eve, “Oh, Nzambi me tuba? Ya kieleka, kasi—kasi ya kieleka. . .” Beno me mona?

¹³⁸ Beno me mona, na kumekaka na kubanza na yawu na yina Nzambi tubaka na mbandukulu, “Nge ke kufwa!”

¹³⁹ Yandi tubaka, “Yinga, Nzambi tubaka yawu, kasi ya kieleka. . .” Beno me mona yina ke mwangisa yawu? Beno me mona? Kasi yina Nzambi tubaka, Nzambi ke zitisaka, Yandi ke na nsatu ya lusalusu ve na Satana. Yandi ke zitisaka Yawu. Na yina, ba ke vunaka ata fioti ve na nzila ya yawu. Ntangu yayi beto ke bakula, kuna, ti ya basisaka na mutindu ya yawu.

¹⁴⁰ Ntangu yayi na Genèse awa, beto ke mona ti, na manima ya kumwangisa ya ndikila yayi ya luzabu, ntangu yayi, science kele luzabu, mpe nyonso beto ke kuwa kele: “Science, science, science, science.” Dilongi ya nene na lukolo: Science! Bubu yayi, tomabilu ya kulutila kitoko, ya kulutila kitoko *yayi*, yinzo ya kulutila kitoko, yinzo ya kulutila, ya kulutila kitoko *yayi*, ya kulutila kitoko *yayi*. Yinki beto ke na kusala? Kufwa, ntangu nyonso. Beto me sala tomabilu, beto ke bika kutambula na makulu; beto ke bika kutambula na makulu, beto ke kituka mafuta. Mbote, beto kele dyaka ve na muntu; beto kele na bameduses. Ya kele kieleka.

¹⁴¹ Mpe kento, nyonso yina yandi ke sala, ke losa bilele, mpe na manima [Mpangi Branham me bula na zulu ya kima mosi—Mu.] ke fina buto mosi, yawu yina. Na yina, mama ya beno vwandaka tambula tii na yinto, mpe kunata masa, mpe kuzenga bankuni, mpe kutokisa yawu na mwa mbiliki mosi kuna, mpe—mpe bongisaka bilele ya yandi mutindu yina. Mpe beto kele na

pete mingi, kana bawu sala yawu, ya ke kufwa beto. Kasi, beto lenda sadisa yawu ve, yayi kele nsungi yina beto ke na kuzinga.

142 Ata mpe science me tuba ntangu yayi, ti, “Bana-bakento ya bantwenya ke kwisa na kati ya menopause, bakento ya bantwenya ya bamvula makumi zole na tanu.” Mu ke kutana na bawu kaka na ndonga. “Bantwenya ya babakala yango ke luta na nsungi ya bawu ya kukula, na kati-kati ya bamvula makumi zole mpe makumi zole na tanu.” Mama ya munu . . . Kento ya munu lutaka, pene ya makumi tatu na tanu tii na makumi yiya. Mama ya munu lutaka, kubanda makumi yiya na tanu tii na makumi tanu. Beno me mona mutindu bantu ya yimbi kele na bilumbu yayi ya nsuka. Samu na yinki? Beto ke na kusalaka mingi na zulu ya science.

143 Bamvula nkama na makumi tanu me luta, nzietolo ya kutambula mosi kaka ya muntu kuzwaka vwandaka na nzila ya mpunda to na makulu. Mpe ntangu yayi yandi ke luta na avion ya reaction, na kutala dibanza mosi. Beno me mona, science me sala yawu, mpe ya kele ya dyabulu. Ntangu yayi beno ke tuba, “Ya kieleka, Mpangi Branham?” Yinga, tata.

144 Beto baka Genèse ntangu yayi, 4.

Mpe Cain kwendaka ntama ya mvwandulu ya MFUMU, . . .

145 Ntangu yayi beno tala mbote kima ya ntete yandi salaka. (Beno ke tuba na munu ntangu beno ke banza ti beto kele na mingi awa, samu ti mu ke sukisa kaka na yayi kisika nyonso.) Beno me mona, “Cain basikaka na Mvwandulu ya Mfumu.” Kuna yandi salaka kifu ya yandi. Mpe ya kele kisika yina beno ke sala kifu, mpe ya kele kisika mu ke sala kifu, na muniti yina beto ke basika na Mvwandulu ya Nzambi.

. . . Cain kwendaka ntama . . . ya mvwandulu ya MFUMU, mpe zingaka na ntoto ya Nod, na esete ya Eden.

146 Beno me mona mutindu musambidi ya vwandaka, kwendaka pene-pene ya “Esete”, lweka ya Esete.

Mpe Cain zabaka kento ya yandi; mpe yandi kuzwaka kivumu, mpe butaka Enoch: mpe Enoch tungaka mbanza, (beno me mona, civilisation), yandi tungaka mbanza, mpe bokilaka nkumbu ya mbanza yango, landila nkumbu ya mwana ya yandi, Enoch.

Mpe . . . na Enoch butukaka Irad: mpe Irad bu- . . . mpe Irad bu- . . . [Kisika ya mpamba na bande—Mu.]

. . . bakaka bakento zole: nkumbu ya mosi vwandaka Ada, mpe nkumbu ya yina yankaka vwandaka Tsilla.

Mpe Ada butukaka Jabal: mpe . . . tata ya bayina zingaka na kati ya batenta, mpe bayina kele na bibulu.

Mpe nkumbu ya mpangi ya yandi ya bakala vwandaka Jubal: (Mu banza, J-u-b-a-l.) yandi vwandaka tata . . . ya bayina nionso ke bulaka harpe mpe orgue. (Beno me mona, miziki; science, beno me mona, me kota.)

Mpe Tsilla, . . . diaka butaka Tubal Caïn, yina vwandaka yidika bisadilu nionso m-u-t-a-k-u mpe ya kisengo: (na nonzolo yankaka, mutindu kisalu ya mulu, kuvukisa kintwadi), mpe mpangi-kento ya Tubal- . . . Tubal-Caïn vwandaka Naama.

Mpe Lémeç tubaka na bakento ya yandi, Ada mpe Tsilla, Beno kuwa ndinga ya munu; beno bakento ya Lémeç, beno kuwa ndinga ya munu: samu mu me kufwa bakala mosi samu na mputa ya munu, mpe bakala mosi ya ntwenia samu na mputa ya munu.

Ba ke vutula mbela samu na Caïn bambala sambwadi, kasi samu na Lémeç bambala makumi sambwadi . . . bambala makumi sambwadi na sambwadi, to bambala makumi sambwadi.

147 Ntangu yayi beno tala, kaka na ntangu bawu basikaka na Mvwandulu ya Mfumu, bawu bandaka na kutunga bambanza, ba bandaka na kusala bisadilu; ba bandaka na science, samu na kusala mutaku mpe kisengo, mpe—mpe kubula musiki, mpe nionso yina. Beno me mona? Beno me mona? Ntangu yayi wapi kisika ya katukaka? Nani basikaka? Caïn, nkuna ya nyoka. Beno me bakula yawu? Caïn basikaka. Mpe, beno tala, yandi basikaka na Mvwandulu ya Mfumu, mpe bandaka na kusala na science.

148 Ntangu yayi beno tala kisika yandi ke na kusalaka dyaka, beno me mona: science, ndongosolo, bambanza, mayele. Ya kele ya dyabulu. Nani bandaka yawu? Dyabulu. Nani ya kele bubu yayi? Dyabulu. Ba-bombe atomique mpe nyonso, samu na kubebisa beto. Beto ke zinga na kati ya yawu. Beto fwana zinga awa. Beto kele moyo, beto fwana bikana awa. Kasi civilisation ya nene ya Nzambi ke vwanda na yawu ve. Beno me mona? Mpe science ke na kubaka—ke na kubaka bima ya kimuntu mpe ke bebisa yawu na kusala bima yina ba zolaka sala ve.

149 Mpe mutindu mosi kele nsambulu ya science! Ya ke baka Ndinga ya Nzambi mpe ke sala organisation ya dibuundu na yawu, na kisika ya kusala bima yina yawu fwana sala.

Ba ke tuba, “Bilumbu ya bimangu me luta.”

Biblia ke tuba, “Yandi kele mutindu mosi mazono, bubu yayi, mpe kukonda nsuka.”

“Ya kele ve na kima mutindu kubeluka ya Kinzambi.”

150 “Beno kwenda na yinza ya muvimba, mpe beno longa Nsangu ya mbote na bantu nionso. Bidimbu yayi ke landa bayina ke kwikila: Na Nkumbu ya Munu ba ke basisa bampeve ya yimbi; ba ke tuba bandinga ya malu-malu; kana bawu simba banioka,

to kunwa manganga yina ke kufwaka, ya ke sala bawu yimbi ve; kana bawu tentika maboko ya bawu na zulu ya bambevo, bawu ke beluka.” Yinki? Na yina, bayinsi nionso, bantu nionso, kivangu nionso! “Tala, mu kele na beno, tii na nsuka ya ntoto, nsuka ya—ya yinza *kosmos*, kima ya muvimba, nsuka ya nsuka ya ntangu.” Yandi kele kieleka kuna!

¹⁵¹ Mpe ntangu yayi, beno me mona, bawu ke baka science, mpe ke tuba, “Oh, mbote, ntangu nyonso beto ke vukana kintwadi mpe ke kuma ya dibuundu, mpe beto ke kuma *yayi*, to mambele ya mbote ya kusungama. Beto ke futa ya beto. . . .”

¹⁵² Beno me mona, ya kele—ya kele ve kutuba, “Oh, ya kele ve na kima mutindu Nzambi.” Beno kuwaka bande ya munu na zulu ya baklisto ya luvunu na bilumbu ya nsuka. Beno me mona, Yesu ya luvunu ve (Satana zabaka ya kulutila yina, beno me mona), kasi ya kele baklisto ya luvunu. *Klisto* zola kutuba “yina ba me pakula.” Mpe kieleka bawu kele ya kupakulama, ya kupakula (yinki?) Mpeve-Santu, samu na kusala bidimbu mpe mambu ya ngitukulu. Mpe bawu ke sala yawu.

¹⁵³ Kasi, beno me mona, ntangu ya ke kulumuka ntangu yayi, beto kele na nsungi ya nsuka, kuna ve na nsungi ya Pentecote. Beto kele awa na nsungi ya nsuka. Mpe nsungi ya ntete bandaka na Ndinga, yina vwandaka *Klisto*. Mpe nsungi ya nsuka fwana suka na Ndinga, yina kele *Klisto*. Mpe bima yankaka yayi, mpusu yayi mpe nyonso yankaka yina, mutindu mu me bangula, kele kaka minati ya Ndinga, samu na kusadila lukanu ya yawu tii Yawu ke kuma na ntela ya muvimba, beno me mona, na yina mbuma ya kieleka vwandaka.

¹⁵⁴ Ntangu yayi nzila ya 25.

Mpe Adam zabaka kento ya yandi diaka; mpe yandi butaka mwana ya bakala, mpe bokilaka yandi Seth: Samu ti Nzambi, Eve tubaka, me pesa munu mwana yankaka ya bakala na kisika ya Abel, yina Cain kufwaka.

Mpe na Seth. . . Mpe na Seth, na yandi diaka butukaka mwana ya bakala; mpe yandi bokilaka yandi na nkumbu ya Énosch: mpe na ntangu yina bantu bandaka na kubokila nkumbu ya MFUMU.

¹⁵⁵ Beno me mona mutindu nkuna yina ya nyoka kwendaka na science, na ndongosolo, bambanza, mpe musiki, mpe bima ya nene, mpe ndongosolo, mpe science, mpe nyonso yankaka.

¹⁵⁶ Kasi nkuna ya muntu ya kudedama, yina ya vwandaka. . . . Beno me mona, Eve vwandaka ve na nkuna. Beno zaba yawu. Kento kele ve na nkuna, kento. Yandi kele na diki, kasi nkuna ve. Kasi yandi. . . ba bokilaka yandi, nkuna, beno me mona, yina ba bokilaka na nzila ya mbokolo ya Nzambi, yandi bakaka nkuna. Mpe Nkuna ya nene, ya kieleka, na kento, vwandaka Nzambi yina pesaka. Beno me mona, Nzambi pesaka yandi nkuna na

kisika ya yina Cain kufwaka; ti, mbeni, lufwa, nkuna ya Nzambi kufwaka, na kubeba kuna, beno me mona. Nzambi soolaka, na nzila ya kento, Nkuna, yina kele Klisto, beno me mona, samu na kuvutula dyaka nkuna ya kieleka. Beno me mona yawu? Mpe na yawu beno ke mona kubeba me nata lufwa na nzila ya malongi mpe mayele, mpe yina beto ke bokilaka bubu yayi, science mpe nsambulu, mpe nyonso yina, ya nataka lufwa. Kasi yandi. . . pesaka yandi, nkuna, mpe kuna bakala bandaka na kubokila na zulu ya Nkumbu ya Mfumu, mpe bandaka na kuvutuka dyaka na Ndinga. Beno me mona?

¹⁵⁷ Mpe beno bambuka moyo, beno landa nkuna yina, mutindu beto ke zonzila yawu na basabala fyoti, na zulu ya nyoka yayi. Beno ke landa yawu, ya ke landana kaka na nzila ya Masonuku. Beno tala yawu mbote. Bavinu yango zole ke kula kaka kintwadi, mutindu beno kuwaka Nsangu ya munu na zulu ya "vinu." Ba me kwisa kintwadi, mpe pene-pene mingi ti ya lendaka vuna bantu ya kieleka ya kusolama, kana ya lendaka salama, na bilumbu ya nsuka ntangu ya kumaka na yintu. Ya ke basisa mbuma kaka mutindu blé, kasi ya kele ve blé, beno me mona, ya kele ve. Ya kele mpusu, dyaka.

¹⁵⁸ Ntangu yayi, beno me mona kuna: civilisation, ndongosolo. . . Mu banza ti mu kele dyaka na Masonuku kumi, beno me mona, mu sonikaka kuna, kasi mu banza ve na kuluta yawu. Kasi beto me bakula na yayi, lukolo yina, science mpe civilisation, kele ya diabulu. Ya kieleka. Ya kele ve ya Nzambi. Ya kele ya dyabulu. Ntangu yayi, mu ke tuba ve ti beno zolaka kuzwa yawu ve. Ve, kieleka ve. Mwa ntangu fyoti na manima, mu lenda, beto ke lakisa yawu; ti Nzambi. . .

¹⁵⁹ Kaka mutindu beno ke lwata bilele, beno bakento, beto babakala. Beto zolaka lwata bilele ve, na mbandukulu. Kasi, beno me mona, na kuvwandaka yina beto ke zinga na nsungi yayi beto ke salaka, beto fwana lwata bilele, beno me mona. Ya kele ya kusoola na beto na kusala yawu. Beto fwana lwata yawu. Kasi na mbandukulu, beto zolaka sala yawu ve, beno me mona, samu ti beto zabaka ata disumu ve. Kasi ntangu yayi beto fwana sala yawu.

¹⁶⁰ Ntangu yayi beto fwana kuzwa batomabilu. Ntangu yayi beto fwana kwenda bisika mpe kutala, mpe nyonso yankaka, na batomabilu mpe science, mpe nyonso yankaka, kasi ya kele ve ya Nzambi. Ya kele ve ya Nzambi. Malongi, kasi bawu kele. . .

¹⁶¹ Mutindu ya ndongosolo ya Nzambi, civilisation, science, kele na mutindu ya yawu ya kisina, beno me mona, ya ke kwenda na zulu ya yayi yina beto ke na kusalaka.

¹⁶² Ntangu yayi beno tala, ba ke baka mwa bima mpe ba ke tula mwa bima kisika mosi, mpe ya ke sala kima ya chimie yina ke bebisa. Ntangu yayi bika yawu na kisika ya yawu ya mbote,

yawu kele nyonso ya mbote; tulaka yawu kisika mosi, yawu kele yonso yimbi. Beno me mona? Beno me mona, ya ke nataka lufwa.

163 Mpe ntangu beno ke meka na kubaka Ndinga ya Nzambi mpe kutula Yawu na nsambulu ya yinza yayi, beno ke nata lufwa na beno mosi. Ya ke kufwa dilongi. Beno me mona yina mu zola kutuba? Ya ke kufwa muntu. Beno ke tuba, “Mbote, ntangu yayi beno tala, beno ke kwikila na Nzambi.”

“Oh, ntangu yayi, beno fwana kwikila *yawu* ve. Kana beno—beno—beno. . . dibuundu ya beto.” Kaka kuna, ya kele kiti yina ke kufwa—yina ke kufwa dilongi.

164 Beno fwana bika kima nyonso kubwa, mpe kubaka kaka Ndinga. Beno bikana swi na Ndinga yina. Beno kwenda ve. Ntangu Nzambi tubaka mutindu yina, ya kele kaka yina ya kele. Mu ke kipe ve yina ndongosolo lenda lakisa.

165 Na bilumbu ya Noé, ba lendaka siamisa ti ya vwandaka ve na maza na zulu kuna na mazulu. Kasi Nzambi tubaka ti ya vwandaka na bayankaka vwandaka kulumuka, mpe ya kwizaka. Ya kele kieleka.

166 Bawu ke tuba bubu yayi, “Ya kele ve na tiya na zulu kuna, yina ke kubwa.” Kasi beno tala yawu kubwa, kilumbu mosi. Uh-huh. “Wapi mutindu beto ke sala *yayi* mpe ke sala *yina*?” Beno tala mbote Nzambi ke sala yawu. Yandi ke sala yawu. Yandi tubaka ti ya ke sala yawu.

167 Mpe Nkuna yina ke simba kisika mosi kuna. Nkembo na Nzambi! Kima mosi kaka Yandi ke sosa, bubu yayi, kele ntoto ya lubutu, kisika mosi kuna Yawu lenda buta.

168 Ya ke banda na muntu, mpe ba ke bebisa Yawu, mpe ke mwangisa Yawu mutindu yandi salaka na Eve. Ya bandaka na Eve, samu na yandi kubasisa mbuma mpe kubasisa bana ya Nzambi, bana ya Satana ve. Kasi yandi vwandaka na ntoto ya lubutu, mpe yawu kubwaka na kisika ya yimbi. Mutindu mosi Ndinga ke kubwa na kati ya muntu ya kukondwa lukwikilu, to muntu ya ntembe, to muntu yina ke tulaka ntembe. Ya ke sala mambele ya dibuundu na kati ya bawu, kasi ata mbala mosi ve mwana ya bakala to mwana ya kento ya Nzambi. Beno ke tuba na bawu na kubika nsuki ya bawu kukula; ba ke seka na kizizi ya beno. Beno ke tuba na bawu na kusala *yayi* to *yina*, to bakala yina ke sala yawu, ba ke seka yandi na kizizi ya beno. Ya kele ve bana ya Nzambi. Ya kele ntoto ya yimbi, kasi ba ke na kusimbaka Nkuna. Beno me mona bapakulami ya luvunu? Ba kele ya kupakulama, yinga, na Mpeve-Santu, ke zonza na bandinga, mpe ke sala bidimbu mpe mambu ya ngitukulu; kasi ya kele ya Satana.

169 Yesu tubaka, “Mingi ke kwiza na Munu na kilumbu yina, mpe ke tuba, ‘Mfumu, Mfumu, mu basisaka ve bampeve ya yimbi, mpe—mpe salaka bisalu ya nene, ya ngolo mpe mambu ya

ngitukulu na Nkumbu ya Nge?” Yandi tubaka, “Beno kwenda ntama na Munu, beno bisadi ya disumu ya nku.”

¹⁷⁰ Yinki kele disumu ya nkú? David tubaka, “Kana mu me kuzwa disumu ya nkú na kati ya ntima ya munu, Nzambi ke kuwa munu ve.” Beno me mona?

¹⁷¹ Disumu ya nkú kele kima yina beno zaba ti beno fwana sala mpe beno ke sala yawu ve. Beno zaba ya kulutila mbote, kasi beno ke sala yawu ve. Ya kele disumu ya nkú, beno me mona. Beno zaba ti bawu zolaka vwanda na Ndinga ya Nzambi, kasi samu na mbote ya dibuundu, to samu na mbote ya muntu yankaka, to kima yankaka, beno ke kwenda ntama na Ndinga ya Nzambi mpe ke sala yina organisation me tuba. “Mbote, mu zaba ve. Dibundu ya munu ke tuba ti beto fwana sala yawu mutindu *yayi*, mpe mu ke kwikila yawu mutindu yayi.”

¹⁷² Beno me mona, mpe ya kele kieleka na ntuala ya beno ti beno zolaka sala yawu ve. Yina kele disumu ya nkú. “Kwenda ntama na Munu, nge yina ke salaka disumu ya nkú.”

¹⁷³ Beno tala Santu ya nene Paul, na ya Ntete ya Corinthiens 13, yandi tubaka, “Ata ti mu zonga na bandinga ya bantu mpe ya Bawanzio . . .” Ntangu yayi beno bayina zola, to muntu mosi zola, kukangama na yawu ya kele nzikisa ya Mpeve-Santu, Paul tubaka, “Ata ti mu zonga na bandinga mutindu bantu mpe Bawanzio, mpe mu ke na zola ve” mutindu beno nionso kele awa na kati ya beno, “Mu ke kima mosi ve.” Beno me mona?

¹⁷⁴ Beno lenda zonga na bandinga, yinga, samu ti Yawu kele Ndinga. Mulongi lenda baka Ndinga yayi, mpe kukwenda mpe kulonga Yawu, mpe kutuba Ndinga yango, mpe Ndinga yango ke yela. Kasi mulongi lendaka vwanda muntu ya luvunu, yandi mosi. Ya kele Ndinga. Beno me mona? Kasi kivangu ya kieleka ya moyo ya Nzambi ke bakaka lukanu nionso, Ndinga. “Muntu ke zinga kaka na dimpa ve, kasi na konso Ndinga yina ke basika na yinwa.” Mpe beno bwela kima yankaka na Yawu, beno kele na kimenina ya kubeba.

¹⁷⁵ Kana mu banda awa na blé, mpe mu me tula grateron na yawu, mpe mu ke vukisa yawu kintwadi, kana ya landaka salama mutindu yina na nzila ya putulu, mpe beno tula yawu kuna na kati, mu ke kuzwa blé grateron. Beno me mona? Ya ke talana mutindu blé, mpe dyaka ya kele grateron. Ya kele ve luzingu ya kieleka, ya lenda dyaka ve kupema yawu mosi. Beno me mona? Ya ke basika, kasi ya lenda ve kubuta yawu mosi.

¹⁷⁶ Ngombe lenda buta na mpunda ya kento, mpe yandi ke buta mulet, kasi mulet yango lenda buta ve na mulet. Ya kele kuvukisa.

¹⁷⁷ “Bika ti konso ndinga kubuta landila mutindu ya yawu.” Beno me mona, ya lendaka buta mbala mosi. Mpe dibuundu lenda kwiza mutindu organisation, mbala mosi, kasi ya lenda ve kubuta yawu mosi; ya ke basisa organisation yankaka.

Ba-Luthérien lenda vukana ve ba-Luthérien; ya basisaka Méthodiste. Mpe Methodiste me basisa Pentecotiste. Beno me mona, ya lenda ve kubuta yawu mosi, samu ti ya kele ya kufwa. Ya lenda banda ve reveil. Wapi kisika Nzambi me bandaka ntete réveil na kati ya organisation? Beno tala na disolo ya beno. Yandi salaka yawu ata fioti ve. Ya kele organisation yina ke salaka na manima ya reveil.

¹⁷⁸ Ntangu Luther, muntu ya Nzambi, kwizaka na nsangu ya kunungisama, na manima ya yandi kwizaka dibuundu ya ba-Lutherien. Ata mbala mosi ve ti ba lendaka tunga yawu.

¹⁷⁹ Na yina Nzambi fidisaka muntu na nkumbu ya John Wesley, kuna me kwiza reveil na manima ya yawu. Yinki bawu salaka? Bawu salaka organisation. Ata mbala mosi ve ti ya lendaka kubuta dyaka. Beno me mona, ya kele kisita.

¹⁸⁰ Alleluia! Kasi Ndinga ya Nzambi ke vwanda na nsuka! Ya kieleka. Ya ke basisa mutindu ya Yawu.

¹⁸¹ Awa me kwiza Pentecotiste, yandi lenda ve; beno tala yina yawu salaka, ya kubongisa. Yawu lenda ve kubuta yawu mosi. Bawu lenda vwanda na ba-Oral Robert mpe kima nyonso yankaka, bisika nyonso na yinsi, ya lenda sala yawu ve. Ya ke vutuka mbala mosi na dikanda yina ya ntama ya mbalata. Ya lendaka ata fioti ve! Ata lutangu ya batsokota ba ke kotisa yawu, ya kele *dyaka*, ata lutangu ya bima ya kimpeve yina kele na yawu, mpe nyonso yina ya kele, ya kele (Beno, ntangu yayi beno kele bakuluntu, beno zaba yina mu ke na kuzonzila.) ata lutangu ya babakala mpe bakento yina kele na yawu, mpe nyonso yankaka, mpe lutangu ya fyoti ya bampangi ya bakento yina ke tungaka awa, mpe mwa mabuundu mpe ba-organisation, ya lenda buta ve reveil. Ya me suka. Yawu sabukaka yinza, na Ndinga ya Nzambi, mpe yawu lenda dyaka ve kubuta yawu mosi. Nzambi ke telemisa kima yankaka mpe ke banda Ndinga ya Yandi ke kwenda na ntwala; mpe kana yawu ke sala organisation, yawu ke kufwa mpe! Ya kele kieleka. Ya lenda kubuta ve yawu mosi, samu ti ya kele mvukisa. Ya kele kieleka.

¹⁸² Beno tala disangu ya beno yina ba me vukisa bubu yayi, ba ke tuba, “Yina kele disangu ya kulutula kitoko.” Ya kele—ya kele yina ke kufwaka. Ya kele yina ke na kufwa beno. Baluzingu ya beno vwandaka ve ya kusala samu. . . Banzutu ya beno vwandaka ve ya kusala samu na yawu. Banzutu ya beno kusalamaka samu na mbuma ya kieleka. Ya kele samu na yina batata ya beno mpe bamama ya beno, mpe nyonso yina, zingaka ntangu ya yinda. Ya kele samu na yina bawu vwandaka bantu ya nene. Bakala, ya bambvula makumi sambwadi na nana, vwandaka na kikesa mpe ya nene. Beno me mona, bawu vwandaka zinga na bima ya yinza. Beno tala mbote biboba yayi ya mongo awa, ke zinga na mbambi mpe—mpe bambuma ya ntete. Tula muntu na kati awa, na kati ya mbanza; awa yandi

me kwisa, na mvindu ya nene, pene ya bamvula makumi tatu na tanu, makumi yiya. Ya kulemba? Kieleka! Mbote, mu ke kwenda ntama na dilongi, mutindu yina ve?

¹⁸³ Beno tala, kasi mu ke na kumeka na kunata yawu na beno, ya kele civilisation, yina beto ke bokilaka bunkadulu. Bunkadulu, beno me kuwaka mingi samu na yawu. Ntangu yayi, beno me kuwaka ntete yina mu zolaka ti bunkadulu ya munu kuvwanda? Ya kele muntu yina kele ve na nerf mingi samu na kufwa kalumbu, kasi lenda kudya kivumu ya yawu na manima muntu yankaka kufwa yawu. Na yawu, mu, ya kele yina mu—mu—mu—mu banza na bunkadulu, beno me mona. Ya kele, ya kele kieleka, beno me mona. Beto ve. . .

¹⁸⁴ Nzambi ke kwizaka ve na. . . Ya kele ve na *bunkadulu* ya muntu na kati ya Nzambi. Beno ke *temuna* yandi ve na kati ya Nzambi. Yandi me butama, nkuna ya Nzambi, na Nzambi, ntangu nyonso vwandaka Nzambi, mpe lenda ata mbala mosi ve kuvwanda kima yankaka kasi Nzambi. Beno kele ve ya kulongoka na kati ya Yawu.

¹⁸⁵ Ntangu yayi, wapi mutindu yandi kele na mutindu ya Eden ya yandi, mpe na nzila ya nkuna ya kutengama! Satana salaka Eden ya yandi ya nene, ntangu yayi. yinki ya kele? Bunkadulu, science, mabuundu ya kitoko, bayinzo ya nene ya bangunga, milongi ya kitoko ya kulengula, malongi: “DA., THÉOLOGIE, Doctorat ya Philosophie, Doctorat ya Droit, Docteur ya Mikanda, Docteur ya Théologie, Badokotolo!” Ntangu nyonso beno ke zonza yawu, ya ke nataka kaka yandi ntama mingi na Nzambi, ke losa kaka yandi na ngaanda. Mpe mabuundu ke zolaka ve muntu kutelama kuna mpe ke sadila bampova mutindu “hit, hain’t, mpe tote, mpe carry, mpe fetch.” Bawu zola yawu ve. Bawu zola kima mosi ya kitoko.

¹⁸⁶ Ya kele kima mutindu mosi Cain vwandaka na dibanza ya yandi (papa ya bawu, na mbandukulu), pesaka bafololo mpe bambuna ya ntoto, ntangu Nzambi zolaka munkayulu, muntu na luzayikisu ya Nzambi: ya vwandaka menga! Poire ve, to pêche ve, to prune, to nionso yina ya vwandaka, to, abricot mutindu ba ke tubaka yawu ntangu yayi: ya vwandaka menga yina basisaka beto na disamba ya Eden, menga ya kubeba, kento yina ke bika nkuna ya muntu ya yimbi ba me kuna na kati ya kivumu mpe kubanda yawu.

¹⁸⁷ Ntangu yayi beto ke mona, samu na kusiamisa ti Nsangu kele kaka ntangu, yina mu ke na kuzonzila beno, samu na kusiamisa yawu, beno tala bilumbu ya kuvukisa bankuna bubu yayi, na kumekaka na kusala mutindu ya kulutila kitoko. Beno tala kuvukisa bankuna. Beno tala na yinti ya kimenina. Awa na été me luta. . .

¹⁸⁸ Ya vwandaka été yayi, ya vwandaka, Mu vwandaka na mwa fololo mosi ya ntama (yandi vwandaka lakisa munu kuna

baminuti fyoti me luta, ya kwizaka na dibanza ya munu), mwa fololo mosi ya mfinda yina mu vwandaka na yawu na mbeto awa, mu zolaka pesa maza na kima yina mbala zole kilumbu mosi, samu na kubumba yawu moyo. Ya vwandaka mvukisa. Kasi ya bandaka na mwa fololo yankaka ya jaune, yina ba tulaka kintwadi na kima yankaka, samu na kusala fololo yayi.

¹⁸⁹ Mpe mwa muntu yina telamaka kuna, ntangu, beno lendaka tima dibulu ya bameatele tatu kukondwa kuzwa madidi mingi samu na kulosa mate. Beno me mona, ya vwandaka—ya vwandaka—ya vwandaka zinga kaka na fundu-fundu, mpe ya vwandaka kaka kitoko, mpe ya zolaka vwanda ve na maza. Ya vwandaka ya kisina. Ba me vukisa yawu ve. Ya vwandaka ve na kima ya kuvukana na yawu, ya vwandaka fololo ya kieleka.

¹⁹⁰ Mpe yayi vwandaka kima mosi ya kuvukisa na yawu, ba fwana kulosila yawu masa mpe kusimba-simba yawu, mpe kubondila yawu. Beno me mona? Samu na yayi ya vwandaka na mfunu ve; ata banzinzi vwandaka ve na zulu ya yawu. Beto fwana kufula yawu, mpe nionso yankaka, samu na kukeba yawu; mpe banzinzi mpe mwa baniama mpe nionso yankaka, samu na kukeba bawu ntama mutindu yina. Kana ve, ya ke kufwa bawu.

Nge ke na yawu ve, banzinzi ke kwisa pene-pene ya yandi ve!

¹⁹¹ Oh, ya kele Muklisto ya kieleka, ya kisina, yina me butuka mbala zole. Beno lenda meka yandi na kima nyonso beno zola. Yandi kele kaka Muklisto. Beno meka yandi kisika nyonso beno zola kuvwanda, yandi kele dyaka Muklisto.

¹⁹² Ntwenya mosi ya mama ya bampangi awa, bayankaka ya bantu ya beno, dibuundu ya bawu sonikaka munu mukanda kilumbu yankaka yina. Yandi tubaka, “Papa zola ve ti mu kwenda na baseball. . . to mwa nsaka ya basketball, Mpangi Branham. Beto ke kwikila. . .” Yandi tubaka, ya vwandaka na bamvula kumi na zole, yandi tubaka, “Mpangi Branham, beto ke kwikila ti nge kele na Ndinga ya Mfumu, na yina nge ke tuba na beto ntangu yayi.” Yandi tubaka, “Mu ke banza ti papa kele na yimbi. Kasi,” yandi tubaka, “yina nge ke tuba, mu ke kwikila.” Ntangu yayi, mwana-kento yina ya kitoko, beno me mona.

¹⁹³ Na yawu mu banzaka, “Mbote.” Mu tubaka, “Cherie, tala kana nge kele Muklisto, nge kele Muklisto kisika nyonso. Ata kisika beno kele, beno kele kaka Muklisto. Kasi,” mu tubaka, “beno me mona, kuna na lupangu ya basketball, yina papa ke na kubanza, beno ke kuwa bawu kuzenga ndefi mpe kulandila mutindu yina. Mu ke kwikila kaka ti nge ke vwanda Muklisto. Kasi, nge me mona, papa me kuma mbuta mingi na luzingu kulutila nge. Nge me mona?” Ntangu yayi, mu tubaka, “Ntangu yayi nge me kuma na bamvula kumi na zole, mpe nge tubaka ti nge vwandaka ntwenya ya kento, ya bamvula yiya. Ntangu yayi yandi zola ti beno zenga ba-popie ya ba-papié. ‘Oh, beno landila,

mu kele ve na ntangu ya kuzenga ba-popie ya ba-papié.' Beno me mona, nge kele na bamvula ntama mingi kulutila mpangikento."

¹⁹⁴ Ntangu yayi ya kele kisika yina dibuundu fwana vwanda bubu yayi, ntama mingi na kati ya Ndinga ya Nzambi. Ba-Methodiste ve, ba-Baptiste, ba-Pentecotiste, ba-Presbytérien; kasi ba kwendaka ntama mingi na kati ya Ndinga, na bana-babakala mpe bana-bakento ya Nzambi. Uh! Mbote mingi. Mbote mingi. Nsangu me kuma na ntangu ya ngudi, yina me siamisama.

¹⁹⁵ Na nzila ya science, na nzila ya science ya yandi mpe kusososa, beno me mona, bawu mekaka na kubebisa nyonso, kusala nkuna ya luswaswanu, kusala kima ya kuswaswana, kukumisa yawu kitoko mingi.

¹⁹⁶ Beno bampangi ya beto ya bakento. Mu bakulaka mwa ntangu fioti me luta, wapi mutindu kitoko bawu talanaka. Oh, beno lendaka lutisa bawu kuna na kizame ya yinza ya muvimba kisika bayankaka ya Gloria Swanson yayi, to mosi ya ba-stripteaseuse yayi mpe nyonso awa na Californie, mpe ba vwanda kondwa yawu mafuku ya bakilometele. Kasi nkumbu ya bawu kele ve na buku yina ya lukumu; ya kele na Buku ya Luzingu, beno me mona. Uh-huh. "Mpeve ya lembami mpe ya kukikulumusa kele kimvwama ya nene samu na Nzambi." Mpe Biblia ke tuba samu—samu na bakento ya beto na "kukubama na mpeve ya lembami mpe ya kukikulumusa, ya kutumama na babakala ya beno, mpe na lembami." Ya kele yina kele ntalu ya nene na meso ya Nzambi. Beno me mona? Ya kele kieleka.

¹⁹⁷ Nionso yayi ve awa, yawu yina bawu salaka; bawu, Bakento ya Max Factor, me kumisa bakento kitoko mingi, ya ngaanda, yina kele ya Satana. Bima nyonso yina kele ya dyabulu. Beno zaba yawu? Kieleka. Ya kele nyonso ya dyabulu.

¹⁹⁸ Ntangu yayi mu ke bambuka moyo na mwa kento ya munu ntangu yandi vwandaka kitoko mpe ntwenia, yandi vwandaka ve na maquillage. Ve. Yandi kwisaka, mu botikaka yandi na Nkumbu ya Yesu, ntangu yandi vwandaka na mwa ba-robe ya fioti mutindu *yina*, beno me mona. Kasi ntangu yayi yandi me kuma kiboba, yandi tubaka, "Mu ke na kukumaka kaka na mifutu mingi."

¹⁹⁹ Mu tubaka, "Nge zaba, na yina nge ke kuma kiboba, meso ya munu ke kuma mpimpa. Mu ke bambuka moyo na beno mutindu beno vwandaka, mpe mu ke bambuka moyo mpe mu zaba na kati ya ntima ya munu yina beno ke vwanda kilumbu mosi. Beno me mona? Beno me mona? Beno me mona, na mpeve ya lembami mpe ya mbote yina kele na beno, Nzambi ke vukisa beto diaka kuna. Yawu yina, na yina beto ke soba ata fioti ve ntangu yina." Na yina samu na yinki . . .

200 Kasi, beno me mona, na bilumbu ya Noé, ntangu bana ya Nzambi monaka bana ya bakento ya bantu, vwandaka kitoko, ba bakaka bawu bakento, samu na bakento. Beno me mona, bana ya Nzambi kumonaka bana ya bakento ya bantu, samu ti bawu vwandaka sexy mpe—mpe lwataka mutindu yina. Bawu—bawu ke lula bakento, mpe bawu kwendaka samu na bawu, beno me mona.

201 Mu ke vutula matondo ti beno bana ya Nzambi monaka na zulu ya yawu, beno me mona, mutindu bakento yina ke salaka bawu mosi. Beno me mona?

202 Kasi yinki ya kele? Ya kele nyonso kitoko. Ya kele kuvukisa bankuna. Baka bayankaka ya bawu, sukula kizizi ya bawu, bawu. . . beno zolaka zaba ve yina beno zolaka kuzwa. Beno me mona? Mpe ya kele kieleka. Mu banza ya kudasuka mingi samu na kunwana na scie circulaire, mpe—mpe ya nganzi, ya mvindu, mpe ya kubeba, yina ke zingaka na babakala yankaka.

203 Mu ke kipe ve kento ya munu, mu—mu ke zitisa kukwikama na kento nyonso. Ntangu mu vwandaka mwana-bakala ya fioti, mu ke tubaka ntangu nionso, “Kana kento mosi ya ndombe zolaka kuvwanda ya kukwikama, mu zolaka mwangisa ditonzi ya nsuka ya menga ya munu samu na kukeba yandi mutindu yina.” Beno me mona, mu ke zitisa yina kele mbote, kima ya mbote. Mu mekaka na kuzinga na nzila ya yawu, luzingu ya munu nyonso. Mu vwandaka ntwenya na ntangu yina, ntangu yayi mu kele kiboba, mu me sobaka ve mabanza ya munu mwa fyoti. Beno me mona?

204 Science, na kifwani mosi yina Eve salaka, yandi salaka diaka na dibuundu, kubebisa yandi. Yandi nataka makani ya yandi bubu yayi, na nzila ya dibuundu ya yandi yina ba me vukisa, Eden ya yandi ya bilumbu yayi yina beto ke na yawu bubu yayi. Beto ke na kuzinga na kati ya Eden ya science, Eden ya Satana, Eden ya science.

205 Kana beno zola kubaka yawu, na Esaie 14:12, mu ke tanga yawu na beno, kana beno zola, kana beno zola, : 12 na 14, “Satana tubaka na yandi mosi, mu ke zangula munu mosi na zulu ya Kulutilla Zulu.” Yandi ke vwanda na kimfumu, ti ya ke vwanda mpe na bana ya Nzambi ke sambila yandi.

206 Mpe ya kele kaka kieleka yina yandi salaka. Yandi salaka yawu na nzila ya dibuundu, nsambulu, mutindu yandi bandaka na mbandukulu, nsambulu. Yandi salaka yawu.

207 Mpe mutindu profete Paul monaka, na Thessaloniciens ya Zole kapu 2, ti yandi—yandi ke mata NA . . . ya yandi, Eden ya nene ya science na kilumbu yayi, na science, na ndongosolo mpe civilisation. Mpe yandi salaka yawu, yandi mosi, mpe na nsuka yandi ke zanguka na conseil oecuménique, kisika mabuundu nyonso fwana fukama na ntwala ya yandi. Mpe beno me mona yina ya kele? Ya kele mpeve yango ya luvunu na kusalaka na

kati-kati ya bantu; bana ya Nzambi, yina ba salaka na kifwani ya Nzambi; mpe bana ya bakento ya bantu, yina ba salaka na kifwani ya muntu; ba me tula bawu na mutambu na yisi ya luvunu, mutindu yandi salaka na Eve. Mpe yandi me sala, samu na yandi mosi, na nzila ya bansalulu ya yandi ya science mpe malongi mpe bunkadulu, tii yandi ke kuzwa yandi mosi Eden ya bilumbu yayi, ya science, ya lufwa.

²⁰⁸ Kisika wapi, Nzambi, na nzila ya Ndinga ya Yandi, zonzaka, mpe Yandi vwandaka na Eden kukondwa lufwa; ata science, ata malongi mutindu beto kele na yawu bubu yayi, to ntemuka ve.

²⁰⁹ Beno me mona yawu ntangu yayi, beno bakula yawu? Beno me mona, ntangu yayi yandi me kuzwa Eden ya yandi. Beno tala, mabuundu nionso ke sambilaka yandi. Yina ke tula, ba-Théssalonicien ya Zole awa, Yandi tubaka:

. . .muntu yina ke kukibokilaka yandi mosi Nzambi, yina me vwanda *na kati ya tempelo ya Nzambi*, . . .

Mpe nyonso . . .na zulu ya ntoto ke fukama mpe ke sambila yandi, bayina bankumbu kele ve ya kusonika na kati ya buku ya luzingu ya Mwana-dimeme . . .na ntwala ya mbandukulu ya ntoto.

²¹⁰ Beno me mona, ya kele Eden ya bilumbu yayi. Ntangu yayi yinki yandi ke na kusalaka, yandi mosi? Yandi ke na kutambula yandi mosi, Rome, kisika ya yandi ya nsuka, ya nene ya Eden.

²¹¹ Beno me mona kisika wapi pape yango kwizaka awa kilumbu yankaka yina? Beno talaka bawu nyonso kumi na tatu yina salamaka kuna? Yandi zonzaka bampova kumi na tatu, kuzwaka kumi na tatu yina ke bakaka kominyo, zonzaka na stade Yankee, yina kele kumi na tatu. Bima nionso vwandaka kumi na tatu.

²¹² Mpe lutangu ya yinsi ya beto kele kumi na tatu, ke monika na kapu ya 13 ya Apocalypse; banzila kumi na tatu, bambwetete kumi na tatu, banzila kumi na tatu, balutangu kumi na tatu na zulu ya mbongo ya kisengo, bambwetete kumi na tatu na zulu ya mbongo ya kisengo, nyonso kele kumi na tatu, mpe kento.

²¹³ Awa ke kwiza pape, yintu, na kento, mbeni ya Klisto ya luvunu na kento ya makwela ya luvunu, ya science, yina yinza ya beto, yinza ya beto ya Amerika ya esete awa, to ya Yinza ya Wesete, me twadisa yinza, na kati ya science, ke kwisa na yandi, na dibuundu ya yandi ya science, mpe ntangu yayi ba-Protestant nionso ke fukimina yandi, beno me mona, na kumi na tatu. Beno me mona yawu? Nyonso kele na kumi na tatu. Yinsi ya beto ya muvimba, nyonso yankaka, kele kumi na tatu, yinza ya kento. Beno me mona, beto bawu yayi, beto me kuzwa yawu. Yawu kitukaka yinza ya kento na disamba ya Eden, kasi ya ke vwanda yinza ya Nzambi kilumbu mosi. Beno tala ntangu yayi.

Ntangu yayi, mpe, bapofete yayi mpe bima yayi zabisaka yawu na ntwala.

214 Mpe ntangu yayi nionso me kwisa diaka mutindu ya vwandaka na ntwala ya Nzambi yina vwandaka tambula na zulu ya ntoto, ya me kuma kawo ya kimpeve. Ya kieleka, ya ke mutindu yina.

215 Awa beno tala Eden ya zole vwandaka fwanikisa na ntete, samu na kuvuna, na kutala samu na kubaka Musolami. Beno tala ntangu yayi, ti. Mu ke fwanikisa awa, kaka baminuti fyoti. Ntangu yayi mu fwana sukisa, samu ti ya kele ngunga kumi na mosi, mpe na yawu beno kuwa. Ba-Eden yayi zole, mutindu Eden yayi mekaka na kifwanukusu, kaka mutindu Satana salaka na mbandukulu, na Eve na Eden ya kieleka, Eden ya ntete. Beno tala kaka bawu mbote, kufwanikisa kintwadi ntangu yayi. Beno me mona, beto me bakula yawu, ntangu yayi muntu nyonso ke bakula na mutindu ya mbote, Eden ya science beto ke na kuzinga. Beno me mona? Ntangu yayi, ya vwandaka ve Eden ya Nzambi.

216 Eden ya Nzambi ke kwizaka ve na nzila ya science, ya ndongosolo, ya mayele. Ya ke kwizaka na nzila ya Ndinga, beno me mona, ke bokila bima nyonso yayi mutindu ti ya vwandaka ve. Mpe beno tala, na disamba ya Eden. . . . Beto fwanikisa kaka yawu fyoti. Ntangu yayi beno tala.

217 Bakala mpe kento ya yandi (yintu ya . . . na disamba ya Eden), bankwelani vwandaka kinkonga mpe zabaka yawu ve. Ya kele kieleka? Na Eden ya Nzambi, zole vwandaka kinkonga mpe zabaka yawu ve.

218 Ntangu yayi bawu kele dyaka kinkonga mpe zaba yawu ve, Apocalypse 3, Nsungi ya Dibuundu ya Laodicée.

Samu ti nge. . . kele kinkonga, muntu ya mawa, mputu, muntu ya kyadi, mpofo, mpe nge zaba yawu ve.

219 Ntangu yayi, na Eden ya Nzambi, ba vwandaka kinkonga mpe ba zabaka yawu ve. Mpe ntangu yayi na Eden ya Satana, kuvwanda yawu na nzila ya science mpe ndongosolo, bawu kele dyaka kinkonga mpe zaba yawu ve. Wapi kubeba!

220 Beno tala bubu yayi. Beno tala bakala, ke meka na kulwata ba-sous-vetements ya yandi; mpe yandi ke meka na kulwata bilele ya yandi. Mpe yandi ke na kumeka na kubika nsuki ya yandi kukula mutindu ya yandi; mpe yandi ke na kuzengaka yandi mutindu ya yandi. Oh, oh, oh, la la! Babakala ke meka na kuvwanda bakento, bakento ke meka na kuvwanda bakala, kubeba!

221 Ya kele kima mutindu mosi dibuundu ke na kusalaka, kima mutindu mosi, Nsungi ya Laodicée. Beno tala.

222 Ya kele samu na yina bawu zabaka ve ti bawu vwandaka kinkonga, na mbandukulu, ya vwandaka na Mpeve-Santu yina vwandaka bumba bawu na kinkonga. Bawu zabaka yawu ve. Mpeve-Santu vwandaka na zulu ya meso ya bawu, bawu monaka

kima yankaka ve kasi mpangi ya bawu ya bakala mpe ya kento, beno me mona. Misiku, bawu zabaka ve ti bawu vwandaka kinkonga. Mpeve-Santu!

²²³ Ntangu yayi mpeve ya mvindu, ya yimbi mpe ya kulula, me bumba yawu; ndongosolo, science, “Kasi, ya kele science. Kulwata bakupe, ya kele mupepe mingi.” Ba-Indien ke longaka beno kulutula yina. Ba ke lwata bulanketi, samu na kuvwanda na mupepe, beno me mona, mpe ba ke tula yawu na zulu. Beno me mona, ndongosolo kieleka me vutuka na ntangu mosi, kima yina kaka ti bawu ke banza ti nataka bawu na bunkadulu mpe civilisation, mpe vutula bawu diaka na kati ya kukondwa kuzaba diambu, ya kulutula yimbi na yina bawu vwandaka na kisika ya ntete.

²²⁴ Lukolo, malongi, beno tala balukolo! Beno tala kuna na université, na nkokila yankaka yina, bana-babakala yina! Ba-bébé yikwa me butuka na bamama ya bantwenia yina kuna, samu na bamama ya bantwenia konso mvula na yinza ya université! Beno ke banza! Beno ke tuba, “Yayi kele mvindu na bala-bala.” Mpe bana-babakala yayi, “mayaka makumi zole na mosi,” ba ke bokilaka bawu, mpe ke tulaka rouge à lèvres, mpe—mpe na bansuki ya kubenda na mbunzu, mpe ya kubalala na bigoudis mpe ya ke diembela kuna. Ba ke tubaka mutindu yina. Mpe mvindu tii na nkingu, ya kukondwa bunkete! Beno ke tuba, “Mbote, ya kele nkonga ya bantu yina ba me losa.” Ya kele mutindu yina? Ya kele balongoki ya université.

²²⁵ Bawu kuzwaka kulawuka-malafu ya nene, na nkokila yina. Mpe bawu zabaka ve yinki kusala, mpe na yina, samu na kukisepelisa. Mpe kunwa malafu mpe pité, mpe nyonso mutindu yina, vwandaka mingi ve samu na bawu. Ba bukaka milangi, mpe ba kwendaka mbangu na kielo ya bakento, mpe ba vwandaka konkota na kielo; ba vwandaka kwisa, ba vwandaka bula bawu na kizizi. Bawu katulaka disu ya muvimba ya mwana-kento mosi, mingi na kati ya bawu me kubeba samu na luzingu ya muvimba. Beno ke banza ti ba ke bika yawu kupanzana? Ve.

²²⁶ Zole ya bana ya bawu ya babakala vwandaka tambula na bala-bala, mpe bankwelani zole ya bakento ya kuvwanda na zulu—na zulu ya bimatinu, mpe bawu vwandaka finga bakento. Bapululu bakaka bawu mpe tulaka bawu na kati ya boloko. Kuluntu kulumukaka kuna. Mpe munkiti nionso yina ke na kutomaka na université yina, yina kele kaka bisalu yina ba me kuzwa kuna. Yandi tubaka, “Bawu kele bana ya munu. Nge bika bawu.” Bawu bikaka bawu.

²²⁷ Beno bawu yayi; ntemuka, ndongosolo, ke twadisa lufwa mpe kawo, mpe difelo. Beno kuwa ve kima yina. Beno tala ntangu yayi.

²²⁸ Eve losaka kaka mwa disu, samu na kutala mutindu yinza vwandaka. Beno zaba, bambala mingi, “Beto fwana lwata kaka

mwa fyoti-fyoti *yayi*.” To, beno zaba yina mu zola kutuba, mu fwana kaka kutala fyoti, samu na kumona. Ntangu yayi na Santu Jean to . . .

²²⁹ Ya Ntete ya Jean 2:15, Nzambi tubaka, “Kana beno zola yinza to mpe zola ya yinza, zola ya Nzambi kele kwandi ve na kati ya beno.” Bima yina kele na ngaanda kuna kele ya kufwa. Beno kele ya kuzengisa bubakala, ya kuzenga na yawu. Beno zola ve bima ya yinza, beno kele ya kufwa. Ba kele ya kufwa. Beno zola ve kima ya kufwa. Ya me pola. Ya ke na nsunga. Wapi mutindu kima ya moyo lendaka zola kima yina kele mvindu mutindu yina? Beno me mona, beno kele ya moyo na kati ya Klisto. Ndinga ke sala beno kuzinga.

²³⁰ Oh, ntangu mu ke banza na yawu na kilumbu yayi yina beto ke na kuzinga, yina ba me bokila na malongi! Beno lenda kota ve na chaire kana ti beno kele na Diplome ya Doctorat, mpe nyonso yina.

²³¹ Ya ke bambuka munu moyo na aumônier mosi, kilumbu mosi, mu katukaka na makesa. Yandi tubaka—yandi tubaka, “Mpangi Branham,” (Ya vwandaka kaka na manima ya Mvita ya Ntete ya Yinza.) tubaka, aumonier tubaka, “sergeant kwisaka mpe tubaka, ‘Aumonier, nge zola mata na zulu ya mpunda samu na kukwenda na munu na kisika ya bitumba, kuna na zulu ya Argonne,’” kuna na La Salle, na Lorraine, na France, beno zaba. Mpe yandi tubaka, “Mu kwendaka kuna na Mfinda ya Argonne.” Mpe yandi tubaka, “Yandi vwandaka baka lutangu ya ba-tanganyika.”

²³² Mpe yandi tubaka, “Ya vwandaka na suka ya Paki.” Yandi tubaka, “Mu manisaka kaka . . . Mu lutaka kuna na infirmière, mpe yandi vwandaka pesa bana-babakala yina lwalaka, rose ya ba-Américain, beno zaba, mosi ya ba-Américain vwandaka sala. Bana-babakala yina bakaka rose yina, mpe bawu bokaka kaka mpe bawu bandaka na kuboka, samu bawu zaba ti yawu me katuka na yinzo.” Beno me mona, yawu katukaka na yinzo.

²³³ Mpe ya kele mutindu mu banza ti beto ke salaka Ndinga, beno me mona, beno simba Yawu, “O Nzambi!” Ya me katuka na Yinzo, beno me mona.

²³⁴ Yandi tubaka, “Mu vwandaka kuwa kitoko na ntima *ya* munu . . .” Yandi tubaka, “Mu kwendaka kuna mpe tubaka . . . Mpe kapitene kwendaka na ntuala samu na kubaka lutangu ya ba-tank yikwa yina ba bebisaka, mpe bima ya mutindu yina.” Yandi tubaka, “Mpeve-Santu tubaka, ‘Kwenda kuna na mwa ditadi yina.’” Mpe yandi talaka bisika nionso. Yandi tubaka, “Bawu losaka gaz ya moutarde mpe gaz ya chlore,” yandi tubaka, “yawu yokaka matiti nionso ya bayinti. Ya vwandaka ve na kima ya moyo yina bikanaka, mpe awa ya vwandaka Paki!” Yandi tubaka, “Yinki Paki! Yinki Paki, ntangu matiti na ntoto ve, kima mosi ve!” Mpe yandi tubaka Kima mosi bendaka yandi na ditadi

mosi. Yandi bendaka ditadi, yandi tubaka, “Ya vwandaka na mwa fololo mosi ya Paki na yisi ya yawu, ba bumbaka yawu na nsi ya ditadi, nionso na kati ya gaz ya ndikila.” Mpe yandi tubaka, “Mu banzaka, ‘O Nzambi, bumba munu na yisi ya Ditadi ya Bansungi, tii kuna ndikila yayi ke luta, mpe bika mu felela na kati ya Yinsi yina kuna.”

²³⁵ Beto lenda telama kaka awa, kana beno zola, samu ti mu—mu kele na mingi awa, mu ke kuma ata mbala mosi ve na yawu, na mutindu nyonso, beno me mona, ya bima. Na yawu mu banza ti mu lenda vutuka dyaka mpe kubaka yawu na nge.

²³⁶ Oh, mu me manisa kaka na kulonga kilumbu yankaka yina, “*Kiyungulu ya Muntu yina ke Banzaka,*” beno nionso me tangaka Yawu, beno me mona, “ke pesaka ntomo ya muntu ya santu.” Beno banza, bampangi. Nyonso yina beno ke sala, beno banza! Éphésiens 5:26, na kati kuna me tuba.

²³⁷ Mpe beto me zonzila na zulu ya mpova *yina ba soolaka na mantwala*, beno me mona, yina ke tesaka disakuba na mingi na kati ya bawu. Ya kele Ndinga ya Nzambi. Yandi—Yandi ke sadilaka yawu, “samu ti ba soolaka beto na ntwala na nzila ya Ndinga ya Nzambi.” Mpe yawu, na yina beto. . . Ntangu ba soolaka beno na ntwala, na yina, ya fwana salama, samu ti ya kele yawu Nzambi—Nzambi soolaka beno samu ti Yandi zabaka yina beno ke sala katuka mbandukulu.

²³⁸ Mpe beno bika ve diabulu kumwangisila beno malongi mpe ndikila, mpe bima ya mutindu yina, “Beno fwana vwanda ya bilumbu yayi. Beno fwana vwanda *yayi.*” Beno fwana vwanda kima yankaka ve kasi bana-babakala mpe bana-bakento ya Nzambi. Mpe kana beno me butuka na Ndinga, beno ke sala yawu. Beno tala yawu. Kana beno baka nkuna, nkuna ya mbote, mpe beno fula yawu mupepe, ya ke—ya ke kufwa yawu. Mpe ntangu ba ke mwangisa bima yayi ya denomination na zulu ya beno, ya ke bebisa ngolo ya Ndinga ya kisina. Kana bawu tuba na beno, “Beno fwana sala *yayi.* Mbote, bana-bakento yankaka ke sala yawu. Bantu yankaka ke salaka yawu.” Beno ke kwikila yawu ve. Ya ke bebisa kubendama ya Nzambi ya Ndinga ya Yandi na zulu ya beno. Beno zaba yawu.

²³⁹ Masonuku ya beto ke tuba, “Beno fwanana ve,” me mwangana, “kasi beno soba,” nkuna yina kele na kati ya beno.

²⁴⁰ Bantu ya bubu yayi ke sala mutindu bawu ke kwikilaka ve ti ya kele na Nzambi. Beno zaba yawu? Bawu ke sala mutindu yina. Ntangu yayi, mu zola ve kubokila bawu bilawu, kasi bawu ke sala mutindu yina. Samu ti, Psaumes 14:1 me tuba, “Kilawu me tuba na kati ya ntima ya yandi, Nzambi kele ve.” Beno zolaka bokila ve muntu kilawu. Kasi kieleka bawu ke sala mutindu bawu kele, samu ti bawu ve. . . Bawu ke sala mutindu ti ya kele ve na Nzambi. Ndinga yayi kele kaka yina me zaba ve.

241 Beno tala, awa kilumbu yankaka yina, ba bokilaka munu kuna na kivinga samu na kutala mbote. . . Billy Paul, mu banza, to bayankaka ya bawu, tubaka ti ya vwandaka na dinaka ya misambidi na televizyo.

242 Beto kele ve na televizyo. Ya ke vwannda ve na mosi na yinzo ya munu, ata mbala mosi ve. Kasi ya vwandaka. . . Beno zola bawu, yina me tala beno. Kasi Nzambi tubaka na munu na kusala yawu ve.

243 Mpe ntangu beto kotaka kuna, mu futilaka na yinzo ya mpangi-kento yayi ya kiboba kuna, yandi vwandaka na televizyo samu ti ba zolaka kuzwa yawu samu na yandi na kufutila yinzo ya yandi. Mpe mu bikaka bawu kutala dinaka ya misambidi, na yina ba—ba bokilaka bawu mpe ba tubaka ti ya vwandaka na bankunga ya Nsangu ya mbote.

244 Mpe beno ke zonzila nkonga ya ba-Ricky, kuna ke sala mutindu bawu salaka, ke kukibokila bawu mosi miyimbidi ya Nsangu ya mbote! Ya vwandaka kukondwa luzitu samu na Yesu Klisto, samu na kumona mutindu ba vwandaka sala, ba ke ningana bawu mosi, mpe—mpe ba-Ricky yayi ya kuzenga bansuki mpe nionso yina, beno zaba. Kaka, ya vwandaka kaka—ya vwandaka talana kaka—ya vwandaka talana kaka mutindu ti ya vwandaka kuseka!

245 Caïn vwandaka muntu ya mutindu yina, musambidi ya bisalu, kieleka. Kasi yandi vwandaka na nkuna ya yimbi na kati ya yandi, beno me mona, mpe na yina ya basisaka nkuna ya nyoka. Satana fulaka mupepe na zulu ya nkuna yayi ya Eden, mpe ya kele yina basisaka Caïn. Yandi tulaka ndikila ya yandi na zulu ya yawu.

246 Yandi, Caïn, zabaka luzolo ya kulunga ya Nzambi. Yandi zabaka luzolo ya kulunga ya Nzambi. Caïn zabaka yawu. Samu na yinki? Kasi, yandi mangaka na kusala yawu, yandi siamisaka ti ya kele nkuna ya nioka. Ntangu yandi monaka luzolo ya kulunga ya Nzambi, yandi mangaka yawu. Yandi monaka Nzambi kusiamisa nsangu ya Abel. Yandi zabaka ti yina vwandaka luzolo ya Nzambi. Beno me mona? Yandi monaka Nzambi kusiamisa nsangu ya Abel. Mpe yinki Nzambi tubaka na yandi? Mpe Yandi kaka, Yandi tubaka, “Sala mutindu mosi, kusambila mutindu mpangi ya nge ya bakala, mpe—mpe nge ke sala mbote.” Kasi beno me mona, yandi monaka luzolo ya kulunga ya Nzambi, kasi yandi zolaka yawu ve. Beno me mona, yandi zolaka kubwela kima mosi na yawu.

247 Mpe ba-théologien yayi ke mona Biblia yayi, bawu ke tangaka Yawu, kasi bawu zola ve kusala Yawu. Beno me mona? Ya ke lakisa nkuna ya nyoka. Ba me mona Yawu me siamisama, mpe na yina kaka na ntwala ya bantu, kasi ya ke monana mutindu ti ya kele mpasi mingi samu na bantu na kukikumumusa bawu mosi na Ndinga ya Nzambi.

248 Beno nionso ke mona ve, ntangu beno ke tuba, beno bakento, samu na bana-bakento, samu na bansuki ya yinda, mpe bawu ke tuba, “Samu na yinki nge kele na nsuki ya nge ya yinda?” Beno me mona? “Samu na yinki nge ke lwataka ba-jupe ya nge, yinda?” Beno ke solula na bawu, ba ke pesa beno mwa dipeka. Ya kieleka ve? Beno me mona, bawu zaba ti ya kele kieleka, kana ya—kana ya kele na mama mosi na kati ya bawu. Beno me mona? Bawu zaba ti ya kele kieleka. Kasi, beno me mona, bawu lenda ve kukikulumusa bawu mosi na yawu, beno me mona.

249 Yawu yina, beno me mona mutindu Caïn salaka? Yandi lendaka ve kukikulumusa yandi mosi na Ndinga ya Nzambi yina me siamisama. Yandi lendaka ve kusala yawu.

250 Oh, mpe ba-Pentecotiste ke tuba, “Nkembo na Nzambi! Alleluia! Mu ke zenga bansuki ya munu, mpe mu ke zonga na bandinga!” Huh! Yina ke lakisa kaka ti ya kele na kima mosi ke tambula mbote ve, beno me mona, nkuna ke basisa kima mosi ya luswaswanu.

251 Nkuna lenda ve. Nkuna ya Nzambi lenda basisa ve kento yina me zengisa bansuki. Yawu lenda sala yawu ve. Ya lenda kaka ve kusala yawu, samu ti Biblia me tuba mutindu yina. Beno me mona, Yawu lenda sala yawu ve. Ve, tata.

Ntangu yayi ya ke monana mpasi mingi na kukikulumusa na Ndinga ya Nzambi.

252 Beno tala yawu na Genèse 4:6 mpe 7, kutanga kaka mwa Masonuku awa. “Kusala mutindu Abel salaka.” Yandi tubaka, “Kana nge—nge mona yina mpangi ya nge ya bakala. . .” Yandi tubaka, “Kwenda na ntuala mpe sala yina Abel salaka, sala mutindu mosi ya lukutakanu yina yandi salaka, mpe—mpe mu ke sakumuna nge. Kana ve, disumu ke lala na kielo.” Ntangu yayi, *disumu* kele “kukondwa lukwikilu.” “Kana beno sala ve mutindu Abel salaka! Beno me mona mu me siamisa yandi, mpe me kumisa yandi ya kudedema. Ntangu yayi kana beno sala yawu ve, na yina ya ke lakisa ti—ti disumu, kukondwa lukwikilu, kele na kyelo.” Beno me mona?

253 Mpe bubu yayi ba ke mona yina Nzambi ke siamisa. Ba ke mona yina Nzambi ke sala. Ba ke mona bima yayi nionso ke salama. Bawu zaba yawu. Nzambi ke na kulakisa bidimbu ya Yandi na mazulu mpe na zulu ya ntoto na yisi, mpe bima nyonso yayi mutindu yina, mpe bawu ke mona yina ke salama. Kasi bawu ke sala yawu ve. Beno me mona, Satana, nkuna ya nyoka; ya mayele mingi, basikaka na baseminere, ya kulongoka na kisika, konso ndinga, bima nyonso, beno telama kaka na chaire mutindu ya kulunga, mpe konso ndinga fwana vwanda kieleka, grammaire fwana vwanda ya mbote, mpe nyonso kele mbote. Beno me mona? Kieleka, bawu lenda ve kukikulumusa bawu mosi, muntu mutindu yina. Beno me mona, bawu lenda kaka ve kusala yawu. Bawu ve. Bawu lenda kaka ve kusala yawu.

²⁵⁴ Ntangu yayi, “Kana ve, disumu kele na kielo; kukondwa lukwikilu kele,” na yina yandi kumaka na luzolo ya kutumama ve. “Mpe ntangu beno zaba kusala mbote, mpe beno sala yawu ve, samu na beno ya kele disumu,” kana beno zaba yina kele mbote mpe beno ke sala yawu ve. Beno me mona? Na yina yandi kumaka na luzolo ya kukondwa na kutumama na manima Ndinga me siamisama, na yina yandi sabukaka ndilu ya nsuka, kuna ba basisaka yandi na Eden ntangu yandi sabukaka. Ya kele na nzila kisika beno ke kwenda kaka ntama mingi, mpe, kana beno kwenda ntama na lweka yankaka, beno kele na ngaanda. Beno zaba yawu, mutindu yina ve? Ya kele na nzila. Kana beno ke kwikila yawu ve, beno tanga Hébreux 10:26. Ya kele Masonuku yina mu vwandaka tubila kuna, beno me mona.

*Samu ti kana beto sumuka na luzolo na manima . . .
beto me kuzwa luzabu ya kieleka, ya kele dyaka ve na
munkayulu samu na disumu,*

²⁵⁵ Ya kele Ngwisani ya Malu-malu. Ya kele kieleka? “Kana beto sumuka na luzolo na manima beto me kuzwa Luzabu yina ba me longa na nge, ba me tanga na beno, ba me talisa na beno; na manima beto ke mona luzabu ya Kieleka, mpe beno ke kwenda na ntuala mpe beno ke kwikila ve, ya ke vwanda diaka ve na munkayulu samu na disumu.”

*Kasi . . . ba ke vingila lufundusu ya boma . . . samu na
tiya ya mpasi, yina ke bebisa bantu ya yimbi.*

²⁵⁶ Ya kele kieleka? Beno lenda sabuka nzila yina. Mutindu bana ya Israel salaka na nzietolo ya bawu, na kulutaka na ntoto ya kuyuma, Israel salaka mutindu mosi. Na manima bawu kuwaka nsangu ya Moise mpe monaka yawu me siamisama; bawu kuwaka profete ya luvunu yina tubaka, “Oh, ntangu yayi beno tala, bana, beto nyonso kele mutindu mosi. Beto fwana kwelana na mosi na yankaka, mpe beto fwana sala *yayi*.” Mpe Moise tubaka na bawu mutindu yankaka, mpe monaka Nzambi ke siamisa yawu. Samu ti, Balaam monanaka muntu ya kulutika mayela na yina vwandaka Moise, beno me mona. Yandi katukaka na yinsi ya nene kisika ya vwandaka na bantu ya nene, mpe bawu nionso salaka kintwadi, yinsi ya Moab, makesa ya nene, mpe bima ya nene yina bantu na bilumbu ya bawu zolaka vwanda na boma. Mpe awa me kwiza profete, profete, mupakulami, muntu ya luvunu, beno me mona, yandi kulumukaka na mupakulami (beno tala mutindu pene-pene), mpe longaka bantu, mpe mingi ya bawu kwendaka na manima ya yawu. Beno zimbana yawu ata fioti ve. Beno me mona, beno kwendaka na manima ya kima yina vwandaka Ndinga ve, Ndinga yina me siamisama!

²⁵⁷ Beno bika ve muntu mosi kukota awa mpe kutuba na beno kima ya luswaswanu. Beno tala mbote yina Nzambi ke na kusiamisa mpe ke na kutalisaka.

258 Ntangu yayi kana bantu yango talaka na manima, mpe kutuba, “Moise! Nzambi monikaka na mazulu. Mpe bakala yango bokilaka na luzingu, banzinzi, baniamama, bazundu; basikaka na luzingu, bamputa mpe bimbevo. Zibulaka Mubu ya Mbwaki, mpe beto kwizaka. . . Mpe disaka beto mana ya mazulu. Oh, yina kele profete ya beto!”

259 Kasi awa me kwiza profete yankaka, “Nkembo na Nzambi! Mu kele profete, mpe.” Beno tuba, “Ntangu yayi, beno nionso, mu ke tuba na beno. Ntangu yayi, ntangu yayi beno me bakula, mu ke sadilaka grammairi ya kulutula mbote na Moise. Mpe mu kele mutindu *yayi* mpe mutindu *yina*, beno me mona,” mpe nionso yina.

260 Mpe kima ya ntete beno zaba, bawu kubwaka samu na yawu. Mpe mosi na mosi ya bawu kufwaka kaka na ntoto ya kuyuma. Ata mosi ya bawu zingaka. Ata mbala mosi ve ti bawu salaka. Ata mbala mosi ve ti bawu ke vwanda na Mazulu, ata mosi ve ya bawu. Yesu tubaka.

261 Bawu tubaka, “Batata ya beto kudiaka mana na ntoto ya kuyuma!” Beno me mona, ba-Pentecotiste, ya kieleka, beno me mona, kieleka bawu lutaka na banzingulu nionso. Bawu, “Batata ya beto kudiaka mana na ntoto ya kuyuma!”

262 Yandi tubaka, “Mpe bawu kele, mosi na mosi, ya kufwa.” *Lufwa* kele “kukabwana ya Kukonda nsuka.” Ata mbala mosi ve ti bawu ke telama dyaka, ata ti bawu vwandaka na nzila ya banzingulu yayi nyonso. Nsodolo vwandaka tuba, bawu zonzaka na bandinga, mpe binaka na Kimpeve, mpe nyonso.

263 Kasi ntangu ya kumaka ntangu ya kumeka ngolo kati-kati ya Ndinga na kati-kati ya baprofete zole, mosi ya bawu na Ndinga, mpe yankaka yina na Ndinga; bawu zole, baprofete. Beno me bakula? Beno tuba, “Amen.” [Dibuundu me tuba, “Amen.”—Mu.] Mosi na zulu ya Ndinga, mpe yankaka yina na nzila ya Ndinga; bawu zole, baprofete, me siamisama ti bawu kele baprofete. Kasi mosi vwandaka na Ndinga, beno me mona. Bapakulami ya luvunu na bilumbu ya nsuka, beno me mona. Mosi. . . Baprofete, bawu zole, baprofete; mosi na zulu ya Ndinga mpe mosi (mosi) me siamisama na nzila ya Ndinga, mpe yankaka yina me siamisama ve na nzila ya Ndinga. Cain na Abel, dyaka. Beno me mona zole, ya luvunu—ya luvunu mpe ya kieleka? Mbote mingi.

264 Kasi mosi na mosi ya bawu me pola na ntoto ya kuyuma, mpe me kufwa. Mioyo ya bawu me kufwa, mpe me kwenda. Mpe bawu kele kaka na nzila ya kusalu, ke kwenda na dibuundu mpe bima ya kieleka yina Nzambi tumaka bawu na kusala, kasi ndimaka mulongisi ya luvunu, yina ba siamisaka ve na nzila ya Ndinga, samu na kulakisa ti ya kele kieleka. Kasi, yandi vwandaka Docteur ya Théologie, mpe nionso yina beno zola bokila profete ya kieleka, kasi vwandaka siamisa ve na kimpeve

na nzila ya Ndinga mpe na nzila ya bidimbu ya Nzambi. Mpe bawu kufwaka na ntoto ya kuyuma; bantu ya ludedemo, bantu ya lukumu, bantu ke sambilaka, kufwaka, mpe ke vwanda ata fioti ve na Mazulu.

265 Beno me mona kisika beto fwana tambula? Beno me bakula? Beno bika yawu ve kukota na malembe.

266 Mutindu ya vwandaka na ntangu ya nkuna-Ndinga ya Noé tungaka nsobolo yina tepaka na zulu ya masa kubanda na ntoto tii na mazulu. Ya wakanaka bulawu na bantu, na kuzwa mwa nsambulu mutindu Noé kuzwaka. Mpe yandi tubaka na bawu, yandi tubaka, “MUTINDU ME TUBA MFUMU. Nzambi me tuba, mpe mvula ke na kwiza.”

267 Science, mpe bantu ya kulonguka mpe misambidi ya kilumbu yina, tubaka, “Beni tala kiboba yayi ya muntu ya luvunu. Yandi me kuma kiboba, mabanza ya yandi me lembe.”

268 Beno me mona, kasi yandi vwandaka ya kusungama, samu yandi vwandaka profete yina me siamisama. Mpe na yina, na ntangu ya nsuka, nsangu ya yandi vwandaka ya kusiamisama. Yinki yandi zolaka sala? Yandi sobaka katuka ntoto na Nkembo, na nzila ya nzasa, ya Ndinga yina yandi vwandaka longa. Ya sobaka.

269 Mwangisilu ya science bebisaka nionso ya bawu tii na lufundusu. Bawu polaka na zulu ya bamasa ya lufundusu, ya kufuluka ya masa.

270 Yinki bantu ke meka na kusala bubu yayi, na nsungi yayi ya nene ya science ya ndongosolo, dibuundu ya Eden, me vutuka diaka na Eden ya yawu, na mutindu ya science, na kisika ya Ndinga? Ba ke na kuzangula Ndinga ya Nzambi? Bantu ke meka na kuzangula Ndinga ya Nzambi, to bawu ke meka na kuzangula bawu mosi? Yinki ya kele? Mu ke kukiyufula?

271 Nkuna ya dibuundu kele ya kutengama: luzabu, dinaka, me nata ti dikanda ya muvimba diaka, na nzila ya science, samu na kuvwanda landila science yina zaba diambu ve samu na Ndinga ya Nzambi. Science zaba ve Ndinga ya Nzambi! Ya kele yinwa ya nene, mutindu yina ve? Kasi, ba kele.

Beno tuba, “Ya lenda vwanda ve”?

272 Ya vwandaka ntangu Yesu kwizaka. Kilumbu yina Yesu kwisaka, bantu yina—yina zabaka Ndinga yina ya Nzambi, kaka na nzila ya mukanda. Bawu ve? Kieleka. Kasi bawu zabaka ve Nani Yandi vwandaka, na ntangu bawu monaka Nzambi na zulu ya mapapu ya yembe, ke lungisa mpe ke sala kaka kieleka yina Yandi tubaka ti Yandi ke sala. Mpe Yandi salaka kaka yina Ndinga tubaka. “Kana Mu ke sala ve bisalu ya Tata ya Munu, na yina beno kwikila Munu ve.” Kasi Yandi salaka kaka mutindu Ndinga tubaka ti Yandi ke sala. Mpe bawu vwandaka bantu ya

science na bilumbu yina, kasi landila science yina zabaka kima ve, samu na kusala na luzolo disumu.

²⁷³ Kulula me kufwa meso ya bawu. Ba kele na nsatu ya Ndinga ya Nzambi samu na kulakisa yandi—samu na kulakisa kinkonga ya bawu. Na Apocalypse 3, yandi tubaka, “Mu ke longisila na nge na kusumba na Munu collyre, ti meso ya nge lendaka zibuka, ti beno lenda mona kinkonga ya beno.”

²⁷⁴ Collyre kele Ndinga ya Nzambi, kubeluka ya meso yina ke basisa beno na bima ya yinza, mpe ke soba beno, na nzila ya ngolo ya Nzambi, na kati ya Mvwandulu ya Yandi. Na yina beno me mona! Beno ke tuba, “Mu vwandaka mbala mosi ya kuzimbana, ntangu yayi ba me mona munu. Mu vwandaka mpofo, kasi ntangu yayi mu me mona.” Beno me mona, ya ke vwanda luswaswanu.

²⁷⁵ Ya kele yina mbokolo ya dibuundu kele bubu yayi, ya kele, “Mu ke longisila nge na kwiza sumba na Munu collyre samu na meso ya nge, ti nge fwana pakulama na collyre ya Munu, mpe na manima nge ke mona.”

²⁷⁶ Bika ti Mpeve-Santu kwiza na zulu ya muntu nyonso yina kele kieleka na kima kuna! Kubeluka ke katukaka kubanda na kati kuna. Bika ti kubeluka yina kukatuka na Mpeve yina kele na kati ya beno. Kana ya kele Mpeve ya kieleka ke na kupakulaka Nkuna ya kieleka, Ya lenda sala kima ve kasi ke buta mwana-bakala to mwana-kento ya Nzambi. Kasi Mpeve ya kieleka lenda kwiza na zulu ya nkuna ya grateron, mvula lenda kubwa na zulu ya grateron, mpe ya ke sala yawu kuzinga kaka mutindu mosi ya ke kubwa na zulu ya blé mpe ke sala yawu kuzinga. “Kasi na nzila ya bambuma ya bawu beno ke zaba bawu.” Beno me mona? Beto kele yinti ya mbuma, ya Nzambi, yina ke buta Ndinga ya Yandi.

²⁷⁷ Yesu tubaka, “Ti muntu kukimanga yandi mosi, mpe kulanda Munu. Bika yandi kumanga malongi ya yandi, kumanga luzabu ya yandi, kumanga ba-diplôme ya yandi; yandi baka kulunsi ya yandi mpe yandi landa Munu.”

²⁷⁸ Bantu me zimbisa mabanza ya bawu ya kimvuka ya bumuntu. Mu ke na kulutaka mwa Masonuku awa, kaka samu. . . Mu zolaka pesa munu mosi pene ya baminuti tanu na zulu ya yawu, kumi, beno me mona. Bantu me zimbisa bumuntu ya bawu na kati ya mosi na yankaka. Ba kele—ba kele ve mutindu ba vwandaka. Bakala ya kukula, ya bampangi mpe munu, awa, zaba, mpe bakento. Bantu ke salaka ve mutindu bawu vwandaka. Bawu me zimbisa lubakusu ya bawu ya kimvuka. Diambu yina yawu salaka na mabanza—mabanza ya bantu ya science yayi ya bilumbu yayi beto ke na kuzinga, me nata bantu na kuzimbisa mabanza ya bawu ya kimuntu. Ba lenda ve kutala muntu, kento, mutindu mpangi-kento mpe mpangi-bakala. Ya kele kima ya mvindu. Kaka na ntangu bawu. . .

279 Mpe bakento fwana lwata bawu mosi kukondwa buzitu, samu na kubasika na kati-kati ya bantu. Mpe bawu ke tuba, “Mu kele kento ya mbote.” Mbote, yinki yandi ke basisa yandi mosi kuna mutindu yina? Yandi kele ya kufwa meso. Mbote, kana—kana ya beno. . . Kana mosi ya bampangi ya bakento yayi awa, ya—ya mwa kukula, kana mama ya beno to mama ya munu zolaka tambula na bala-bala, mutindu mosi ya bakento yayi, ba zolaka tula yandi na yinzo ya bilawu; yandi vwandaka ve na mabanza mingi samu na kuzaba na kulwata bilele ya yandi. Mbote, kana ya vwandaka bulawu na ntangu yina, ya kele bulawu ntangu yayi. Ya kele dyaka mutindu mosi ya kento. Beno me mona? Kasi bawu me zimbisa bumuntu ya bawu nionso, lubakusu ya bawu nionso. Bawu me zimbisa ya bawu. Mpe na lubakusu ya bilumbu yayi, na luzabu mpe ndongosolo, “Ya kele mavimpi ya mbote, samu na kuvwanda yawu.” Ya kele disumu mpe lufwa! Beno tala. Bawu kele, oh, ve mutindu bawu vwandaka. Ntangu. . .

280 Mpe beno tala na luzingu ya dibuundu. Ya vwandaka, na luzingu ya dibuundu, ntama mingi ve, ntangu profete vwandaka na kima ya kutuba, MUTINDU ME TUBA MFUMU, bantu kwendaka. Bawu bikanaka kaka na Yawu. Bawu vwandaka tambula. Kasi ntangu yayi, “Mu ke zolaka ve muntu yina. Beno soola yandi.” Huh! Beno me mona? Uh-huh. Beno me mona, bawu ke na lubakusu diaka ve. Bantu ke tambulakq kaka ve na nzila ya Mpeve ya Nzambi.

281 Ndinga ya Nzambi kele Mpeve ya Yandi, mpe Ndinga ya Yandi ke kwizaka na profete ya Yandi. Mpe Ndinga fwana kusoba beno na yina bima ya yinza kele, na kifwani ya bana-babakala mpe bana-bakento ya Nzambi. Mpe Ndinga lenda kwiza kaka na nzila ya bapofete yayi, mutindu bawu zonzaka. Mpe ba zolaka fwanikisa yawu na Ndinga, mpe kulakisa ti ya vwandaka Ndinga. Na yina kana beno ndima Ndinga yina, Yawu ke soba beno; na mwana ya bakala ya Nzambi, to mwana ya kento. . . to, na mwana ya bakala ya yinza, mwana ya kento ya yinza, na mwana ya bakala mpe mwana ya kento ya Nzambi.

282 Beno tala na kati ya beno awa. Bantu yikwa kuzwaka nzingulu yina? Mosi na mosi ya beto. Beto kuzwaka nzingulu yango. Samu ti, ba zonzaka Yawu, Yawu vwandaka ya kukwikila, mpe Ndinga basikaka mpe kubwaka na mbeto ya ntima, mpe kuna Yawu me kula kaka na yawu. Beno me mona?

283 Na kusobaka beno mosi, Mpeve-Santu ya Yandi ke sobaka nkuna Ndinga na mutindu ya Yawu. Mutindu kana yinti ya poire ke buta poire, yinti ya pomme ke buta pomme, bima mutindu yina; Ndinga ya Yandi ke basisa bana-babakala mpe bana-bakento ya Nzambi. Yawu yina ya fwana sala.

284 Kilumbu mosi ntangu yinza vwandaka me lala na kati ya mpimpa mpe kawo dyaka, Mpeve ya Nzambi vwandaka tambula

na zulu, na kati ya Nkuna yina ba soolaka ntete. Nkuna yina ba soolaka na ntwala, yina ba soolaka na ntwala, sobaka. Ya bakaka Esaie 9:6.

²⁸⁵ Ntangu yayi, profete yina vwandaka ya kutelama kuna, bakala yayi vwandaka na luyalu na zulu ya bayinsi, bantu. Bantu ya nsambulu ya kilumbu ya yandi kwikilaka yandi; bawu nionso ve, bawu salaka yawu ata fioti ve. Kasi, profete yayi, ba monaka muntu yina kuzonza bima mpe ya vwandaka kaka kieleka. Yina yandi tubaka vwandaka ya kulunga, mpe ya salamaka. Mpe, awa, muntu yayi fwana telama na ntwala ya bantu ya yandi, mpe kutuba, “Mwense mosi ke kuzwa kivumu,” oh, ya kele samu na yina. Kasi, beno me mona, Nzambi tubaka yawu ve, Yandi mosi, Yandi ke zonza yawu na nzila ya baprofete ya Yandi. Ntangu yayi, ya vwandaka ve na kima yina ba sonikaka na kati ya Biblia samu na yawu, kasi profete yayi telamaka, tubaka, “Mwense mosi ke . . .” Na Esaie 9:6, “Mwana me butuka na beto, samu na beto Mwana me pesama; Ba ke bokila Yandi ‘Konseye, Ntinu ya Ngemba, Nzambi ya Ngolo nionso, Tata ya Kukonda nsuka.” Ntangu yayi kana “mwense mosi ke kuzwa kivumu,” Ndinga yina ba tubaka, yina vwandaka germe, mbeto fwana vwanda kuna samu na kuyamba yawu, kilumbu mosi. Yandi sosaka na kati ya bayinsi, ya vwandaka ve na kima mosi. Yandi lutaka na bayinsi, ya vwandaka ve na kima mosi.

²⁸⁶ Mpe pene-pene ya bamvula bankama nana na ntwala, Nkuna yina ba soolaka na ntwala monaka mbeto, mpe yandi kwisaka samu na kukula.

²⁸⁷ Kaka mutindu Nzambi salaka na mbandukulu, “Ti nsemo kuvwanda,” mpe mu banza bankama nana ya bamvula na ntwala kwizaka nsemo. “Ti ya vwanda na yinti,” ya basikaka mutindu yina dyaka, nyonso yina Yandi tubaka.

²⁸⁸ Awa kele Nkuna yina ba soolaka ntete yina ke na kubasisa *Emmanuel*, “Nzambi na beto.” “Mpe samu na Yandi Bantu ya makanda ke sosa,” mpe Yina Beto ke sosa bubu yayi, Yesu. Beno me mona, Nkuna yina ba soolaka na ntwala!

²⁸⁹ Satana mekaka na kufula Yawu, mutindu yandi salaka na Eve. Yandi mekaka na kufula Yawu, kasi yandi kondwaka. Na kufula ya Yandi *awa*, Yandi vwandaka Nkuna yina ba soolaka na ntwala. Ba lendaka ve kukotisa Yandi, samu na kusala Yandi Pharisien to Sadducéen. Ba lendaka ve kusala Yandi kuvwanda mambele ya organisation mosi. Yandi vwandaka Nzambi yina ba soolaka na ntwala, Ndinga yina ba zonzaka. Satana lendaka ve kulosa kukondwa lukwikilu ya yandi na zulu ya Yandi. Yandi vwandaka na kufula na zulu ya Yandi.

Nzambi, mwangisila beto kufula mosi, ya kele kisambu ya munu. Ya kele kieleka.

²⁹⁰ Na yina Mpeve tambulaka na zulu ya Yandi mpe fidisaka Yandi na Calvaire, na kulunsi, samu na kukotisa Nsemo na

kilumbu yayi, mpe Nsemo na Bankuna nionso yina ba soolaka na ntwala na Dibuuundu ya kilumbu yayi, na kusobaka bana-babakala mpe bana-bakento ya Nzambi, na Mvwandulu ya Yandi.

²⁹¹ Beno bula disakuba ve na mpova “predestination.” Mu lutaka na yawu, beno me mona. Mu zola kulakisa beno, Éphésiens 1:5.

²⁹² Beno me mona, kaka mutindu beno vwandaka, beno tala, kaka mutindu beno vwandaka na kati ya tata ya beno; mutindu mu tubaka nkokila yankaka yina, kaka mutindu beno vwandaka na tata ya beno na mbandukulu. Kana beno vwandaka ve, beno zolaka vwanda awa ve. Kasi, beno me mona, ya zolaka kwenda na ntoto ya lubutu, samu na kubasisa beno. Mpe ntangu yayi beno kele mwana ya yandi ya bakala, beno kele mwana ya yandi ya kento. Beno me mona, ya kele nkuna. Mpe na yina kana beno . . .

²⁹³ Kana beno kele Muklisto ntangu yayi, nkuna ya kieleka yina ba soolaka na ntwala, beno vwandaka na kati ya Nzambi ntete ya vwanda . . . Beno vwandaka ntangu nyonso na kati ya Nzambi. Nkuna ya luzingu ya beno, yina kele kinama ya Nzambi, yina vwandaka dibanza ya Yandi.

²⁹⁴ Beto tuba, mumbandu, mama yayi ya kitoko ya kuvwanda *awa*, beno me mona. Nzambi tubaka, “Na kilumbu ya ke vwanda na mwana-kento, nkumbu ya yandi ke vwanda *Kingandi*. Yandi ke vwanda *yayi*, mutindu yayi, mpe *yayi*,” mpe yandi zaba mpe ngunga yayi, “yandi ke vwanda mpe ke kuwa Nsangu, ya kulwata robe ya mbwaki.” Beno me mona, yina vwandaka dibanza ya Yandi. Muntu nyonso yina kele bakala ya beno, mpe muntu nyonso yina yandi kele; mpe Yandi ke nata yayi kintwadi, mpe beno ke vwanda awa na—na mbanza yayi—yayi na kilumbu yayi. Ya lenda vwanda ve na mutindu samu na beno na kukondwa yawu, beno me mona, samu ti beno ke na kukula. Mpe ntangu nyonso yina beno kele nkuna na kati, ke kula, beno fwana basisa kaka kieleka yina nkuna tubaka ti beno ke sala. Ya kele kieleka. Ya kele Ndinga ya Yandi; Yandi ke zitisaka Ndinga ya Yandi, Yandi ke kebaka Yawu.

²⁹⁵ Beno vwandaka na kati ya tata ya beno, mutindu nkuna, mpe beno ke basika mutindu mwana-kento; beno, beno, mosi na mosi ya beno, bampangi ya babakala mpe bampangi ya bakento, beno ke basika. Kana beno vwandaka ve na kati ya tata ya beno, na yina beno zolaka vwanda awa ve.

²⁹⁶ Mpe kana beno vwandaka ve na kati ya Nzambi . . . Kana beno ke kwikila nsangu ya Biblia, mpe Nsangu ya bubu yayi, nsiamisa ya Yawu; ya kele samu na yina beno kele ya kuvwanda awa, samu ti ba soolaka beno na ntwala samu na kuvwanda awa. Beno zolaka vwanda awa ve, na mutindu yankaka; beno zolaka vwanda na bala-bala, mu banza ya kukola, bayankaka ya beno;

mpe bayankaka na kati ya beno awa mpe ke tambula bisika nyonso na kento ya bakala yankaka; mpe beno bakento yina ke basika, ke kwelana, mpe ke tambula bisika nyonso na bakala mosi yankaka ya bakento, to kima mosi mutindu yina. Beno me mona, kasi ba solaka beno na ntuala samu na kuvwanda awa. Beno me mona, beno lenda sadisa yawu ve. Beno kele na Tata, Yandi kele Nzambi, mpe beno vwandaka nkuna.

²⁹⁷ Mpe ntangu Yandi kumaka na kisika mosi, Yandi kele na beno ntangu yayi na kisika . . . Beno vwandaka na kati ya Yandi kuna, mutindu dibanza, ntangu yayi beno kele muntu yina lenda bundana na Yandi. Beno me mona? Mutindu beno vwandaka na—beno vwandaka na batata ya beno, na mbandukulu, kasi ntangu yayi beno kele bana ya babakala mpe bana ya bakento, samu ti beno lenda kubundana na bibuti ya beno. Ntangu yayi beto kele bana-babakala mpe bana-bakento ya Nzambi, yina lenda bundana na Tata ya beto Nzambi. Beno me mona, ya kele kaka kitoko! Beno zola yawu ve? Na yina beno me kuma mutindu Yandi. Mpe kana beto vwandaka bana, na yina beno kele binama, mpe vwandaka na mutindu ya Yandi na mbandukulu.

²⁹⁸ Mpe, beno bambuka moyo, kana beno vwandaka na kati ya Yandi na mbandukulu; mpe ntangu Yesu, yina kele Nzambi, Ndinga kumaka nsuni mpe zingaka na kati-kati ya beto; kuna beno vwandaka na kati ya Yandi mpe beno vibidilaka bifingu yina Yandi bakaka. Nge kwendaka na Calvaire na Yandi, na kati ya Yandi. Nge kufwaka, na kati ya Yandi. Nge vumbukaka, na kati ya Yandi. Mpe ntangu yayi beno me vwanda kintwadi na bisika ya Mazulu, na kati ya Yandi. Beno me mona?

²⁹⁹ Kana mu kele Americain, mu ke vibidila nsoni ya yandi nyonso, mu ke vibidila nkembo ya yandi nyonso. Ata nyonso yina yandi vwandaka, mu kele. Mu kele mwisi-ntoto ya ba-Americain. Mu vwandaka . . . Mu kwendaka na Plymouth Rock. Yinga, tata. Yinga, mu kwendaka na Plymouth Rock. Mu siniaka . . . Mu vwandaka na couloir na suka yina ntangu ba siniaka Nsamunu ya Kimpwanza. Mu siniaka yawu na bawu. Mu kele kitini ya ekonomi ya yandi. Mu siniaka Nsamunu ya Kimpwanza. Ya kieleka. Mu vwandaka na Washington, na Valley Forge, ntangu yandi sabukaka nzadi. Mu vwandaka kuna na suka yina. Mu sambilaka na yandi. Mu vwandaka kuna. Beno vwandaka, mutindu Américain. Kana beno kele Americain, beno vwandaka. Samu ti, kima nyonso yina Amerika kele, beno kele kuna. Mu telemisaka dalapo—dalapo na Guam. Mu sadisaka bawu na kusala yawu. Mu bakaka konso fort. Mu nataka nsoni ya yandi, mutindu revolution. Nionso yina yandi vwandaka, mu kele kuna.

³⁰⁰ Mpe nyonso yina Klisto vwandaka, mu kele. Yina Yandi kele, mu kele. O Nzambi! Kana ba talaka Yandi fanatiki, mutindu mosi mu fwana vwanda. Kana Yandi vwandaka Béelzébul, na nzila ya bisalu ya Yandi ya Mpeve ya Yandi, mu kele mpe. Nyonso

yina Yandi vwandaka, mu kele. Nyonso yina Yandi vwandaka, beno kele.

³⁰¹ Beto fwana vwanda bisadi ya bumuntu ya yandi, kimpwanza ya yandi to nkembo ya yandi, nkembo ya yandi to nsoni ya yandi.

³⁰² Beto fwana vwanda yawu. Beto fwana vwanda Dibundu, Kento ya makwela ya Yesu Klisto. Mu zingaka na Yandi na zulu ya ntoto, ntangu Yandi zingaka. Mu kufwaka na Yandi ntangu Yandi kufwaka. Mu vumbukaka na Yandi ntangu Yandi vumbukaka. Mu me vukana mpe me vwanda na Yandi ntangu yayi na bisika ya Mazulu, samu ti mu kele kitini ya Yandi. Kisika nyonso Yandi kele, kuna mu kele. “Kisika kisadi ya Munu kele, kuna Mu ke vwanda mpe.”

³⁰³ Ntangu yayi Yandi lenda bundana na beto mpe na nzila ya beto, mpe kusadila Ndinga ya Yandi na beto. Na yina, beto kele kitini ya Ndinga ya Yandi. Beto . . . Kana Yandi kele Ndinga, mpe beto kele kitini ya Yandi, na yina beto kele kitini ya Ndinga.

³⁰⁴ Mpe wapi mutindu mu lenda manga ti mu me kuzwa diboko? Ata ti wapi mutindu zoba lendaka, beno lemvočila munu, mwa science mosi lendaka tuba ti—ti mu ke na diboko ve; mu ke na diboko! Mu zaba ti mu ke na diboko. Mu ke sadilaka yawu.

³⁰⁵ Mpe mu zaba ti mu kele na Nzambi. Mu kele na Mvulusi. Mu ke kuwa Yandi na kati ya moyo ya munu. Mu—mu kele kitini ya Yandi. Ya kele yina Ndinga yayi ke tuba, ya kele yina mu kele. Mpe kana mu manga kitini mosi ya *Yayi*, yina ke vwanda mutindu ba ke manga munu, dikutu, disu. Mu lendaka sala yawu ve mpe kuvwanda muntu, na mabanza ya munu ya mbote; to mu lenda manga ve Ndinga ya Nzambi mpe kuvwanda na diboko ya munu ya kibakala, Mpeve ya kieleka ya Nzambi. Mu fwana baka yina denomination ke tuba to yina Nzambi tubaka samu na Yawu. Beno me mona? Beno lenda sala yawu ve.

³⁰⁶ Ntangu yayi, “kusoba.” Yandi lenda soba beto na nzila ya Ndinga ya Yandi, ti beto lenda pema, samu ti beto kele kitini ya Yawu.

³⁰⁷ Mpe ntangu yayi ya kele na bima mingi, yina ke zonzila mbutukulu ya munu ya kimuntu, ya kele na bima mingi na mbutukulu ya munu ya kimuntu yina mu lenda ve kukizangula. Mu ke tuba na beno, mu kele ve na kima ya kusala matalana. Mama ya munu vwandaka musumuki, na kubanda; tata ya munu vwandaka musumuki. Mpe ba me basika na kati ya nkonga ya babandi mpe mibudi-minduki, mpe mingi na kati ya bawu kufwaka na basapatu na makulu ya bawu; ya kukola malafu mpe bantu ya mayuya, mpe nionso yankaka, kuna na Kentucky. Mama ya munu, Indienne. Mpe mu—mu ke na kima ve ya kusala matalana. Mu lenda ve kukizangula na yinti ya munu ya dibuta.

³⁰⁸ Kasi, nkembo na Nzambi, ya kele na kima mosi mu lenda kukizangula, Mbutukulu ya munu ya Zole, yina ke katukaka na Yesu Klisto. Mu lenda kukizangula na Kibuti yina kele na beto,

samu Yandi kele Tata ya munu. Yandi kele Mvulusi ya munu. Yandi kele Mukudi ya munu. Mu lenda kukizangula samu na nyonso yina Yandi me—Yandi me sala samu na munu, samu ti ntangu yayi mu me kuma mwana ya Yandi. Mu kele dyaka ve mwana ya Charles Branham, mu kele mwana ya Yesu Klisto. Ya kele kieleka. Mu lenda kukizangula samu na Mbutukulu ya munu ntangu yayi. Mu lenda ve kukizangula samu na mbutukulu ya munu ya ntete, ya kele na kima mosi ve, mu kele na nsoni ya yawu. Kasi mu kele ve na nsoni ya Mbutukulu ya munu ya Zole. Ve, ve. Mu kele ve na nsoni ya Mbutukulu ya munu ya Zole. Wapi mutindu Yandi salaka yawu? “Na nzila ya kusukula masa na nzila ya Ndinga.” Ya kieleka.

³⁰⁹ Mikwikidi ya kieleka yina ba soolaka na ntwala ke bikana na Ndinga, mpe ba ke bebisa Yawu ve. Ba lenda bebisa yawu ve. Oh, bana-babakala mpe bana-bakento ya Nzambi, samu na yinki beto lenda ve kuzwa kubundana yayi ya nene yina beto fwana kuzwa, na bana-babakala nionso mpe bana-bakento ya Nzambi? Beto zolaka kuzwa yawu. Kasi bawu ke sala yawu ve, kaka yina, samu ti bawu kele ve bana ya babakala ya kieleka mpe bana ya bakento na . . .

³¹⁰ Beno me mona, mutindu mu tubaka nkokila yankaka yina, mu zolaka . . . Mu sonikaka yawu awa, kasi mu kele ve na ntangu ya kukuma na yawu. Mu me kwenda mpe me bika ntangu yayi.

³¹¹ Mwa kati yina ya kati, ya kele kisika beno ke banda, yina kele *moyo* ya beno; na yina beno basika na yawu, beno kele *mpeve*; mpe na manima beno me kuma *moyo*. Ntangu yayi, *moyo* kele na ba-sense tanu, ya kuvukana; *ya zole* kele na ba-sense tanu. Yina kele ngaanda ya nzutu: kumona, ntomo, kusimba, kuwa nsunga, mpe kuwa. Nzutu ya kati kele na zola mpe konsiansi, mpe nyonso yina, ba-sense tanu. Kasi na kati ya kati, yinzo-zulu, ya kele Nzambi to Satana.

³¹² Mpe beno lenda vukisa bima yayi nionso beno lenda kota na ngwisani, mutindu—mutindu, mutindu Muklisto; to beno lendaka basisa bampeve ya yimbi, mutindu Muklisto. Kasi na kati ya yinzo-zulu, mbandukulu, mbandukulu, kele ve ya Nzambi, ata mbala mosi ve ti ya ke vutuka na Nzambi. Beno me bakula yawu? Judas basisaka bampeve ya yimbi ve? Caïphe ve, yina fundisaka Yandi mpe tulaka Yandi na lufwa, ata mpe pesaka profesi? Kasi yandi lendaka ve bikana na Ndinga. Beno me mona? Ya kieleka.

³¹³ Ba sobaka katuka na dibuundu na yinza, na bana ya babakala mpe bana ya bakento ya Nzambi! Beno tala yayi, samu na kumanisa ntangu yayi.

³¹⁴ Mpe ntangu yayi wapi mutindu bana ya Nzambi yina ke yenga-yenga, ke yenga kuna na kati ya yinza, bayankaka na kati ya bawu denomination *yayi*, yina me katuka denomination mosi na denomination, mutindu bambwetete yina ke yenga-yenga,

yina me vwandaka ata fioti ve na kidikilu. Mutindu dikasa na zulu ya maza na automne. Beto vwanda na kifu ya kumonaka yawu, Leo, kuna na Esete. Makasa ke fula na zulu ya yawu, mpe mupepe nyonso ke fula yawu na lweka *yayi* na lweka *yina*.

³¹⁵ Kasi Nzambi ke zolaka ti beto vwanda ya kusikama. “Ya kukangama na Yesu, bitembo ya luzingu mu ke kanga yawu. Ya kukangama na Yesu, mu ke na boma ya mipepe ve to kitembo ve,” beno me mona, nionso yina ya kele. Mingi na kati ya beno ke bambuka moyo na ngunga ya Inch Cape bell, ntangu beno vwandaka na lukolo, mwana ya bakala mpe mwana ya kento na lukolo.

³¹⁶ Abraham mpe nzutu ya Sarah sobaka, samu na kukutana na mutindu ya Ndinga ya nsilulu. Beno me mona, bawu vwandaka kiboba. Abraham kuzwaka nsilulu, mpe Sarah, ntangu yandi vwandaka na bamvula makumi sambwadi na tanu, yandi vwandaka na bamvula makumi sambanu na tanu, me luta menopause; zingaka na yandi kubanda yandi vwandaka mwana ya kento, ya vwandaka mpangi ya kento ya dikanda mosi. Mpe, samu na kuzitisa nsilulu yina, banzutu ya bawu zole sobaka, na bakala mosi ya kiboba mpe kento, na ntwenya ya bakala mpe ya kento, samu na kukutana na nsilulu ya kilumbu.

³¹⁷ Nkembo na Nzambi! Yina ke sala munu kuwa mbote mingi. Beno me mona? Mu ke kipe ve yina mu vwandaka, mu ke kipe ve mutindu mu ke kwiza awa, beto lenda soba na kukutana na nsilulu ya kilumbu yayi. Ntangu, beto lenda zinga kintwadi na bumosi mpe na lembami ya Mpeve-Santu, mpe kuzinga mutindu bampangi ya babakala mpe bampangi ya bakento.

³¹⁸ Enoch, nzutu ya yandi ya muvimba sobaka, samu na kulungisa kifwanikisu, na Nzambi, mpe ba nataka yandi na Mazulu kukondwa kumona lufwa, Enoch vwandaka. Elie salaka mutindu mosi.

³¹⁹ Nzutu ya Yesu sobaka na lufwa, na mutindu ya madidi, ya kubula, ba bulaka yawu tii kuna bamputa ya Yandi mpe bampanzi ya Yandi—ya Yandi monikaka na mukongo ya Yandi. Mpe—mpe ba tobolaka ntima ya Yandi na dyonga mu banza, ya kulutula nene mutindu *yayi*, yina sabukaka na kati ya ntima ya Yandi, mpe Menga mpe masa basikaka. Ata mpe madidi na nzutu ya Yandi, kwendaka, mpe Menga vwandaka kulumuka na dyonga, mpe vwandaka kulumuka na makulu ya Yandi, mpe vwandaka tiamuka na zulu ya ntoto. Mpe Yandi kufwaka mingi tii ngonda mpe bambwetete tubaka ti Yandi kufwaka, ntoto tubaka ti Yandi kufwaka; vwandaka na kulemba ya kidi-kidi, matadi basikaka na ntoto, mpe nionso yina. Nyonso tubaka ti Yandi vwandaka ya kufwa; mpe Nzambi bumbaka kizizi ya Yandi. Yandi vwandaka ya kufwa. Kasi nzutu ya Yandi sobaka. Samu na yinki? Samu ti Nzambi tubaka, “Mu ke bika ve moyo

ya Yandi na difelo, to dyaka kubika Muntu ya Munu ya Santu kumona kupola.” Ya kele ve na mutindu ya kusala yawu.

³²⁰ Mosi ya bilumbu yayi, banzutu ya beto lendaka vwanda ya kutandama na kati ya sanduku. Beto lenda kwiza . . . Beno lenda kwiza mpe kutala munu ya kulala na kati ya sanduku. Mu lendaka kwiza mpe kutala beno, lendaka tuba bampova ya nsuka na zulu ya beno, to kima ya mutindu yina. Kasi beno ke bumba beto ata fioti ve na ntoni. Ba lendaka tula matadi na zulu ya beno. Ba lendaka zika beno na mubu. Ba lendaka sala nyonso yina bawu zola, kasi Ngolo ya Nzambi ya kusoba . . .

³²¹ Na ba-Théssalonicien ya Zole, yandi tubaka, “Mu ke zola ve ti beno zaba kima mosi, bampangi, samu na bayina kele ya kulala. Samu ti beto ke tuba yayi na beno, mpe, na nzila ya Misiku ya Mfumu, ti mpungi ya Nzambi ke wakana, mpe bantu ya kufwa na Klisto ke vumbuka ntete; beto yina ke vwanda ya moyo mpe ke bikana,” mutindu nkunga me tuba na suka yayi, “ba ke vukisa bawu kintwadi na bawu, samu na kukutana na Mfumu na mipepe.”

³²² Ngolo ya Nzambi samu na kusoba, yina me basisa beto na kawo ya science mpe ya ndongosolo, mpe bima ya yinza, mpe lubakusu ya kilumbu yayi ya bilumbu yayi, me soba beto ntangu yayi na bana-babakala mpe bana-bakento ya Nzambi. Mpe ata lufwa yawu mosi lenda simba beto ve na ntoni. “Beto ke soba, na mwa ntangu fioti, na mbwetolo ya disu.”

“Oh, nge zola kutuba?”

³²³ Mu zola kutuba ti ya kele Kieleka! Yesu, Ndinga yina telamaka na zulu ya ntoto, yina vwandaka Ndinga, Yandi yina telamaka, mpe vumbulaka Lazare. Yandi tubaka, “Mu kele Mvumbukulu mpe Luzingu; yandi yina ke kwikila na Munu, ata ti yandi me kufwa, kasi yandi ke zinga. Mpe muntu nionso ke zinga mpe ke kwikila na Munu ke kufwa ata fioti ve.” Ya kele ve na mutindu ya kukanga Ndinga ya Nzambi ya moyo! Ya fwana vumbuka dyaka.

³²⁴ Mpe na kawo yayi ya Eden yayi ya bilumbu yayi ya science yina beto ke na kuzinga, ya mayele mpe—mpe science mpe malongi, bima yayi nionso ya bilumbu yayi, beto ke vumbuka! “Beto ke bika nzutu yayi ya lufwa, mpe beto ke mata samu na kubaka ndandu ya kukonda nsuka,” kilumbu mosi. Beto ke luta na mipepe, mpe yayi ke suka. Samu ti Ndinga ya Nzambi yina me basisa beto na dibanza ya bilumbu yayi ya mabanza ya beto, samu na kusoba mabanza ya beto na kuvutuka ya malu-malu ya bantima ya beto na ntwala ya Nzambi, mpe bampeve ya beto; Mpeve yina mosi yina tubaka yawu, me soba beto tii na kisika beto kele, mpe Yawu ke nata beto diaka na Mvwandulu ya Yandi, na Nkembo ya Yandi, na nzutu ya nkembo.

³²⁵ “Ba ke tunga bayinzo, ba ke zinga na yawu. Ba ke kuna bayinti ya vinu.” Na kati ya kusosa-sosa ya beto nionso; beto

ke kuna disamba, bana ya beto ke belama mpe ke baka mbuma na yawu, mpe bana ya yandi ya babakala ke kwiza mpe ke baka yawu na yandi. Mpe bawu ke kuna, mpe mosi yankaka ke kudia; mpe bawu ke tunga, mpe muntu yankaka ke zinga. “Kasi ntangu ya yinda ke vwanda na bilumbu ya bisadi ya Munu, ba ke vwanda kuna mpe bana ya bawu ke vwanda na bawu. Ba ke tunga yawu, mpe yankaka ke kota na yawu ve. Ba ke kuna, mpe muntu yankaka ve ke kudia yawu.” Yinki? Nzambi ya kieleka, profete ya kieleka yina Ndinga ya Nzambi tubaka “mwense mosi ke kuzwa kivumu,” silaka beto yayi!

³²⁶ Wapi mutindu beto ke kuzwa yawu? Beto kele kaka na ndambu kuna ntangu yayi, beno me mona, samu ti Nzambi tubaka yawu. Ya fwana vwanda. Ntangu Yandi vumbulaka Lazare kuna, tubaka, “Beno banza ve ti yayi kele ngitukulu, samu ngunga ke kwisa ntangu bayina nionso kele na ntoni ke kuwa Ndinga ya Mwana ya muntu, mpe ke basika; bayankaka na nsoni, mpe bayankaka na Luzingu.”

³²⁷ Yinki ya kele? Kusoba, na kusobaka na nzila ya Ndinga ya Nzambi, ke sala beto bana ya babakala mpe bana ya bakento ya Nzambi, mpe ke pesa beto Luzingu na yinza yina ke kwisa. Oh, la la! Yinki dyaka mu lenda tuba? Beno kuwa ve bima yankaka.

Kulula ve bimvwama ya mpamba ya yinza
yayi,
Yina ke bebaka na nswalu nionso,
Tunga kivuvu ya nge na zulu ya bima ya
Kukonda nsuka,
Ata mbala mosi ve ti bawu ke luta!

Simba diboko ya Nzambi yina ke sobaka ve!

Beto yimba yawu!

Simba diboko ya Nzambi yina ke sobaka ve!
(*Yawu yayi!*)
Tunga kivuvu ya nge na zulu ya bima ya
Kukonda nsuka,
Simba diboko ya Nzambi yina ke sobaka ve!

Ntangu nzyetolo ya beto ke manisa,
Kana na Nzambi beto vwandaka kieleka,
Yinzo ya beto ya kitoko na Nkembo,
Moyo ya beto ya kuyangalala ke mona.

Simba diboko ya Nzambi yina ke sobaka ve!
(Kusoba!)
Simba diboko ya Nzambi yina ke sobaka ve!
Tunga kivuvu ya nge na zulu ya bima ya
Kukonda nsuka,
Simba diboko ya Nzambi yina ke sobaka ve!

328 Beno tala science ve, yina ya lenda lakisa, kana ya kele ya kuswaswana na Ndinga. Beno me mona? Beno tala dibuundu ve, yina ya ke tuba, kana ya kele ya kuswaswana na Ndinga.

Samu beto me simba diboko ya Nzambi yina ke sobaka ve!


329 Bantangu ke sobaka, science ke sobaka. Beno simba Diboko yina lenda soba ve!

Tunga kivuvu ya nge na zulu ya bima ya
Kukonda nsuka,
Simba diboko ya Nzambi yina ke sobaka ve!

330 Tata Nzambi, na Mvwandulu ya Nge, mutindu beto me vukana awa na suka yayi na kati ya yayi, na kubakaka Nsangu ya yinda mingi, yandi bakaka ntangu ya yinda, yandi kwendaka yinda mingi, mpe, O Mfumu, mu ke sambila ti Nge ke tula Bankuna yina na kati ya bantima ya bantu yayi. Beno bambuka moyo, Mfumu, beto ke sambila, ti beto kele ya kulemba, mpe ntungulu ya beto kele ya kulemba, mpe beto . . . bantangu yankaka beto zaba ve wapi nzila ya kulanda. Nzambi ya luzolo, Nge pesa beto mpe twadisa beto na nzila ya Mpeve ya Nge ya nene, Mfumu. Sadisa beto. Ata mbala mosi ve kubika beto, Tata. Nge silaka ti Nge ke sala yawu ve. “Ata mbala mosi ve ti mu ke bika nge to mu ke yambula nge. Mu ke vwanda na nge.”

331 Mpe, Tata Nzambi, beto ke sambila ti Nge ke twadisa Mpangi ya beto Leo, mpe Gene. Sala bawu, Mfumu, mutindu ya bantwadisi yina Nge zolaka kuzwa na zulu ya bantu yayi awa; na kusadilaka ve mabanza ya bawu mosi, kasi ti Mpeve-Santu ya nene kutwadisa bawu na yinki ya kusala.

332 Sakumuna babakala yayi mpe bakento, bana yayi ya bantwenia, mutindu, Mfumu, samu na munu. Mpe mu—mu—mu ke sambila ti Nge ke bumba bawu na luzingu ya yinda. Ti, kana ya lendaka salama, Mfumu, beto zinga samu na kumona Nkwizulu ya Yandi. Beto ke kwikila ti beto ke sala yawu, samu beto ke mona bima nionso me kuma pene-pene ntangu yayi. Ya me kuma pene-pene mingi! Pesa yawu, Tata. Beto ke pesa bawu na Nge, na beto mosi, ntangu yayi, samu na kusadila Nge, na Nkumbu ya Yesu. Amen.

Lemvokila munu samu mu me kanga nge ntangu ya yinda. Mpangi Leo. 

65-1031M Ngolo Ya Nsobolo
Kisika Pine Lawn Trailer Park
Prescott, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org